


滄溟先生集

卷三卷四
五言律詩
七言古詩
七言律詩
五言古詩

和
1263
2



明和
1263
卷2



滄溟先生集卷之三

濟南李攀龍于鱗撰

五言古詩

錄別 十二首

悠悠念往路離別從此長何以酬明德攜手歸故鄉
良時不須與且復各盈觴仰視日月馳千載互相望
浮雲難獨留游子暮彷徨綢繆踰皓首風波忽一方

其二

千秋一嘉遇此別安可知良時不努力賤軀欲何為
晨風野蕭條浮雲西北馳河梁臨往路遠望令人悲

游子自有懷悠悠當告誰

其三

長思何益會久留何益歸行人悵明發褰裳路徘徊
嘉期能再至安辭渴與饑浮雲一相失千里常依依
我欲往從之送子東南飛

其四

秋蘭懷芬芳依依樹前庭春華不再盛枝葉皆已零
念昔二三子俛仰如流星羽翼一以垂邈若隔平生
徘徊顧四海誰能喻中情結交各有時千載一濯纓
離別不在遠日月從此征長膏爲路人獨無弟與兄

可自慰願言崇令名

其五

疑起恩愛離別生歡娛念子非一身中懷難久俱
握手一相失奄忽秦與胡新知自言樂山海日以殊
行路方未央出門思故廬浮雲沒景光北風悲有餘
褰裳復四顧徘徊當路衢結髮在戰場皓首爲征夫

其六

四海一黃鵠千里命其儔悲風厲胡馬躑躅鳴相求
何況同袍友從此遠行游離別無忼慨去去且復留
白日沒邊城回首望中州浮雲西北飛河漢東南流

視夜常苦早寒冬正悠悠明月燭羅幃嚴霜切綢繆
俛仰已自喻誰能不懷憂

其七

念當首往路千里邈已臨絲竹發高堂聽我雙龍吟
泠泠江漢流浮雲寒以陰長風激羽翼嚴霜摧北林
慷慨有餘悲新聲愴人心游子失相視征夫淚不任
中曲一俯仰從此無知音故鄉一尊酒願言常酌斟
徘徊戀景光忽爲長與來者自非昔去者自非今

其八

高樓耿長夜攬衣歎且語秋風一何悲游子不得歸

明月照空牀羅帷白蕭蕭三星旣隅列河漢東南朝
黃鵠正徘徊翩翩顧其曹故鄉邈千里慷慨命同袍
浮雲日西北安知心所勞攜手在須臾經時復漂搖

其九

河漢何皎皎衆星錯其間攬衣立前庭明月照苦顏
悲風中夜起蕭蕭有餘寒涕淚應聲零四顧慘無歡
往路信可懷爲樂及盛年游子不自愛故鄉豈難旋

其十

黃鵠難爲羣游子常苦辛念當從此別中懷日以新
清光皎明月遠望不可親高樓正蕭條徘徊四無人

上有千里雲其下起颺塵各言還故鄉握手道何因

其十一

窮冬盛陰氣白日西南微征人常早寐皎月照我扉
故鄉千餘里中夜起懷歸千星駕言邁嚴霜裂裳衣
獨行無儔匹誰知渴與饑穹廬多悲風蕭蕭邊草衰
身在天一隅何得不徘徊

其十二

顏色無常好春華一以零悲風蔽地來四顧何冥冥
寤言懷往路攬衣從此興殺氣拳毛髮涕泣斷爲冰
仰視河漢星離如水中萍景光不戀人游子豈遑寧

夜依牛羊宿日驅駑馬行努力及明時安能愛其情

錄別 又十一首

秋風旣蕭蕭浮雲亦依依四顧但他鄉游子一何微
駕言西北邁中道正徘徊客行無好懷萬事不如歸

其二

三星跂相視新月拳素光兩宮高自出雙闕遙相望
雲霞絢河漢機杼成文章羅幃影四座華燭搖中堂
主人前進酒彈瑟爲清商流焱激長夜殺氣隕嚴霜
蕭蕭墮白髮翩翩曳衣裳男兒不憔悴誰知在他鄉

其三

北風著枯林浮雲苦多陰紅顏日就衰他鄉日就深
別離起中夜對酒不能斟絲竹含妙伎佳人懷好音
眇睐適君意忼慨動君心罷曲一俛仰變爲游子吟
念當事行役淚下難自禁

其四

秋風西北來蕭蕭動百草蕩子無室家悠悠在長道
紅顏能幾時棄捐一何早對客發素書零涕復盈抱
上言故鄉好下言故人老

其五

冉冉年欲度秋蘭采間萎蕩滌千歲情結束欲何爲

美酒不誤人紅顏多所宜萬事自明日行樂此一時
四座慘無言游子中心知浮雲動悠悠故鄉難可期

其六

悲風墮白日天地何冥冥招搖彈北戶河漢條中庭
征夫苦難夜且復命新聲芳言動君子四座無不清
人生卽滿百長此千載名豈如飲美酒趙女奏鳴箏
忼慨盡逸響慰我饑渴情惟念當離別翩翩渺獨征

其七

明月促曙光衆星西北移游子工早行起問夜何其
攬衣出門去長當渴與饑藜藜穿我履嚴霜薄我肌

別離矜盛年老至不自知努力事戰場淚下復無時

其八

浮雲滿天地蕩子欲安之努力事行役棄置以爲期
少年盛意氣忼慨生別離泮泮無根蓬翩翩中林雛
馬上不得語涕淚各纍纍君但重自愛遠道歸有時

其九

秋風動千里游子何翩翩早行多所懷忼慨私自憐
嚴霜覆四野明星出高天涕淚一以下中道忽言旋
踟躕戀徒侶不知身棄捐客從遠方來遺我繒綵殘
故人俱白頭安得獨盛年

其十

昭昭秋素景明月涵金華清酒照朱顏中堂發高歌
游子在外單結交常苦多別離動白頭人生復幾何
悲風搖枯林嚴霜攜女蘿新知雖云樂不如早還家

其十一

高樓出浮雲零露綴綺疏明月照佳人清光相有餘
紛何下涕淚纖纖結素書願持千里心託此雙鯉魚
尊名不可處白髮難久居豈如及盛年駕言歸故廬

錄別 又三首

眇眇遠行客綿綿思故鄉悲風繞車鳴浮雲立馬傍

邊城苦多陰秋氣激繁霜白日匿何時四野一茫茫
落木委空庭游響拂閒房霏霏羅帷影明月在我牀
起視河漢流寥寥夜未央出亦以徘徊入亦以彷徨

其二

大江多悲風秋日澄清陰浮雲無本根天路難重尋
故人一失所結交良苦心游子易慷慨撫劍吐哀吟
白髮行蕭蕭繁霜悴我衿登城望四野明月照北林
悠悠委他鄉中懷安可任

其三

去日苦太易游子無常家別離在俯仰素雪以朱華

驅車就頽景明發泛黃河浮雲騰余征流颿激其波
顧眴當中原忼慨爲悲歌千里一蕭條故鄉復如何

古意 七首

秋風西北起吹我遊子裳浮雲從何來安知非故鄉
蕭蕭胡馬鳴翩翩下枯桑暮色入中原飛蓬轉戰場
往路不可懷行役自悲傷

其二

新人一何好年頗十五餘本自貴家子秦氏有名姝
故人行采桑值我城南隅顏色各精妙手爪亦相如
故人工紈素新人工笙竽笙竽未詎央紈素色已渝

人生無新故夫婿自言殊

其三

嶰陰有孤竹常含千歲霜截爲雄鳴管其音中清商
豈不在人耳世已無鳳凰新聲自一時豔曲亂高倡
安得日相御並坐君子堂

其四

十五漳河女出身邯鄲庭絲竹妙一世纖手何泠泠
清商有餘悲恍慨爲新聲中曲若無人含意已獨明
知音難再遇紅妝日夜零奮響發浮雲摧耳不能聽

其五

英英天上雲不照濁水泥新婚日以親賤妾日以攜
繁聲出皓齒妙舞生春姿縞綦難爲容棄如秋草萎
念當羽翼乖依依卽路岐良人無古歡妾自中心知

其六

中天起雙闕浮雲出兩宮馳道挺其間甲第羅西東
胡姬正當壚邀客過新豐朱脣含綠酒纖爪扣青銅
墮髻似無意紹繞一何工眇睐正愁人流紈動春風
雙雙羽林郎翩翩五色驄挾瑟上高樓調絲方未終

其七

胡鷹一何勁北風一何高朔方士馬地斗酒命同袍

窮冬蹙四野犬獵出臨洮盪石響深谷烈火走平臯
邊聲中夜起殺氣常蕭蕭積陰生戰場白日慘不消
草枯牛羊瘦雪盛狐鼠驕引領望交河層冰正迢迢
詠古 十六首
帝作大唐歌八伯奏卿雲鐘石興麓野人聲一以論
日月發光華爛然星具陳沈璧十二渚岱宗乃于禋
是時闢四門穆穆咸所賓

其二

綏綏塗山狐九尾不自多我往求平定念子無室家
明發興嶽庭乃身參洪波宗疏事則衰祝融揚英華

玉牒沐日月素書出江河

其三

江水一何沛薄大趣歸處朝周過故墟宮室生禾黍
傷彼西山士採薇自相茹千載睹軼詩斯人乃高舉
其四

白雲出山陵乃在天一方東土旣已洽徂西聊倘佯
虎豹自爲羣烏鵲列成行惟帝立嘉命諸夏發其祥
願言顧見女中心以翱翔刊石樹弁茲千載遙相望

其五

杲杲熾日羽施施掩颯旂我車旣已寫四馬亦孔柔

射夫率原隰君子循方舟楊柳橐其鮮鹿豕填相求
多士自允異燕樂成王猷駕言徂東郊出洛朝諸侯

其六

白石粲南山頽鯉麗滄浪單衣裁及盩縕縷遠從商
夜中起飯牛任車自所將爝火辟列星上客爛生光
疾歌一不聞何謂伯與王

其七

菟彼中林鳥拚飛不集枯齒牙一爲獵公子良見圖
矯矯上天龍霧雨旣已敷子推獨耆乾草莽空號呼
懸書下宮門綿山聊與娛

其八

莊王構層臺乃與雲夢鄰東延洞庭石潒陽激清津
趙魏方幸禍况此狼虎秦諫者七十二枕藉以前陳
時非一耕夫三楚訖無人因知沮溺流用卽社稷臣

其九

駕言九臯澤攬彼漸水臺罌置蔽荆岑絕流曲池隈
婉彼三楚士諫獵紆其才大雨忽盈河疾風西北來
洪潦起滔天隕雹激以雷商梁正綏立僕夫行告哀
孤虛無妄設熒惑諒爲災帝德睠荒淫欲去此徘徊

其十

文駟陳大庭膳肉宿所脩羣婢一以盛君子乃見咻
孰謂彼婦口於中可優游蟪蛄遂盈耳鳳兮當何求
斧柯不在手龜山鬱綢繆翱翔七十國交轍奸諸侯
狄水衍其波罔濟非無舟駕言從吾好還轅息我陬

其十一

忽忽歲已莫太臺役方作太上美遨遊禾黍未能穫
滯穗滿甫田風雨殫零落相國一沾襟罷酒不爲樂

其十二

貪吏常苦富廉吏常苦貧不見孫叔敖其子行負薪
五霸相代興主烈難爲臣令名有遺封餘財喜沒人

寢邱雖言惡千載功無湮

其十三

闔閭爲無道厥欲如蛇豕薦食視上國乃政從楚起
昭王在草澤羣臣不復紀使者哭秦庭七日未得理
入郢旣已甚邱隴行見箠感茲告急言誓彼同袍士
賢臣亦多術存亡尤獨美

其十四

吳王旣棲越出遊包山湖道逢一丈人邀我洞庭隅
靈墟發深藏中有神禹書大文祕天地乃傳百六初
金簡歆浮景玉宇回璇樞科斗不可辨鳥跡互盤紆

精華一以洩厭氣直國廬顧見二室顛三石方扶疏

其十五

薛公得馮驩門下知者誰十日居傳舍乃問客所爲
先生惟一劍彈鋏何其悲授室締高國驅車出中逵
主人意已厭同列寧見推田文旣失位傾身與持危
片言悟齊主復相名益垂奇士多侮世藏用匪可窺

其十六

中春陽和起嘉觀臨四方刻石頌功德從臣紀攸長
上以獻泰成下威六暴強郡縣乃作始經緯不踰行
薦號立大義昭設威有章濯俗諒已美刑名非恒常

鞭箠出頑夫二世尋滅亡

雜興 十首

伯牙負高操引曲輒入神從師蹈東海延頸四無人
洪波盪大壑悲鳥方號羣白日坐失色山林忽不分
精氣一以變此調得其真世俗蔽聞見千載遞相因
遺世伎始妙絕絃多苦辛自非鍾子期古道難具陳
其二
離朱不逆景師曠不逆風所用一以失化爲瞽與聾
轡策出大御繩墨出巧工顧眄卽千里結構臨層穹
束手寧自甘狗人道乃窮

良材出大國羣構集明堂構櫨相支持椽桷碩且長
飛棟鬱雲興高軒間重梁衆人稱壯麗輪子起彷徨
柱小亦已撓朽蠹處中央迨天方晦陰室家羅四廂
行者苦無麻居者歌慨慷風雨一漂搖不知僵路傍

其四

良馬躡路歧善言躡嫌疑稱樂自云早日月寢已馳
黃金不可作美酒多所宜清風響高唱令德含妙辭

其五

太元秉經緯天地自生成陰陽遞消息四時相虛盈
雷雨鼓神氣日月宣華英網緼交二儀周流列五行
至和液甘露盛德厭欂櫨唐虞具法象明良熙穆清
垂衣御三事大治無常名

其六

翩何漢宮女紅妝鬱熒熒本自良家子十五充後庭
是時得上意寵至身逾輕貴幸霸天下妙麗傾人城
詔許領椒房嬪御無不驚脣如鬻丹飴齒如鏘玉聲
一當萬乘主常含中道情絕色動千載旦夕誰見明
美惡懸盛衰棄置視合併所以尹婕妤顧眄失平生

其七

詭時苦難遇直道苦不華挈餅羸衆口繩墨矯羣邪
所以上古人工拙無常家陸沈金馬門醉卽據地歌
世久自相玩爲德一何多在羣旣纍生孤貴亦失和
首陽與柳下一龍復一蛇同流雖所願跡邇心則遐

其八

鴻鵠一以舉四海何悠悠局促人間世豈若遠行遊
明時不重至中懷難久留遇合成佞倖美女多所仇
英雄旣失據片語解綢繆所以孔仲尼舍車卽于浮

其九

洞庭大張樂千乘朝崑崙在昔有行幸軒穆一何尊

樓船下河東羽衛覽西垠風起白雲飛隴首望中原
簫鼓發哀情長馳晻回轅入齧妃女脣出接詞客言

其十

名馬不受羈足下有千里黃鵠不受羅羽翼就四海
貴賤自一身出處無二軌時利適愚夫勢衰蹶智士
袂長不攬臂屨縮不截趾陸沈人間世悠悠日復爾

雜興 又十一首

鴻鵠摩蒼天萬里一翱翔迴颯生羽翼浮雲爲低昂
畢逋城上烏黃口自成行俛啄仰相嚇徘徊腐鼠傍

其二

大魚鼓長鬣捷若舉帆幢夜驅蒼梧風凌晨浮九江
怒擊胥山濤洪波爲洶洶本圖運南溟中更不相容
何言一失水湖海難再逢寧如涸轍鮒斗水得所鍾

其三

江南有佳人桃李荔朱顏
若子行從軍閒房重其闌
明月一徘徊形影自翩翩
秋氣響羅帷蕭蕭難獨眠

其四

鳳樓十圍幹龍翔九回流
圓景朝列宿五嶽尊陵邱
聖人膺大命多士自相求
稷契功不刊唐虞德無壽
神明盛驅使衣裳美優游
詩書監二代

在昔紆天經羣后有綢繆
艱難戴王室千載成咸休

其五

長離白鳳雛元馬乃龍子
文采成九苞骨法本千里
箕穎出高人巖穴有知己
抗迹唐虞庭清風振薄鄙

其六

南山有奇鳥朝陽曜其文
下來蘭池飲羅網正紛員
雖復就長纓徘徊懷不羣
枳棘無安步哀鳴激青雲

其七

翩翩西北風蕭蕭枯桑林
登高使人望秋氣悲我心
叢臺蔓寒草易水清且深
當時燕趙士恍慨有遺音

其八

駕出薊北門東望元英宮高臺造浮雲碣石來悲風
客卿既裂地戰士亦論功稱系遷大呂昭王氣何雄
汝篁一不植千里生飛蓬

其九

逍遙臨蓬池言陟梁王臺還顧望大河洪波渺悠哉
飛雪蔽中原北風千里來馳驅名利途無駿不駑駘
精衛自微鳥東海生塵埃

其十

古今一旦暮俯仰成興衰不見桑榆雲千里相蔽虧

其十一

黃金苦易盡紅顏安可爲如何膏梁士拂拭使人悲
萬事無不有何言能自持巢由乖世度高行衆人疑
俯仰在當路得喪未可期湯火煎太和傾側使神危
終身繫羅網失勢還相欺念我平生歡臨觴命妖姬

古詩後十九首 并引

前有十九首故後言之猶稱古者其文則
十九首也其文則十九首而以屬辭辟之
制轡策於埴中恣意於馬使不得旁出而
居然有一息千里之勢斯王良造父所爲

難爾

其一

行行萬餘里依依夢故鄉見君累長夜攜手立彷徨
寤言心尚爾忽在天一方越鳥東南飛胡馬鳴相望
眊昧人自好棄捐人自老徘徊亦何益努力苦不早
思君度餐飯歲月漫浩浩慷慨卽別離故鄉勿復道
搖搖車馬客依依燕趙女沾沾倚箏立交交夾窗語
盤盤高結出颿颿中帶舉浮雲忽自歸蕩子漫無所
天寒錦衾薄空牀難獨處

其二

其三

白石何歷歷松栢何離離人生天地間一日不可知
斗酒無常置良會無常期沈吟厚與薄爲樂無乃遲
宛洛美游戲冠帶自相隨宮闕起雲中第宅羅四垂
王侯負貴氣佳客以盛衰君但視車馬攬策振其綏
良會屬今日彈箏倚新聲唱苦令神傷三變不可盈
中曲忽自置躑躅一再行欲因更促柱難爲聽者情
人生局一世悠悠終何成要路多坎坷先秋慘其榮
來者率如此焉知千歲名

其四

三五樓上女徙倚當雙扉紅妝妙一世誰不攬容輝

絃歌入青雲新聲亮所稀千載為一彈含意有餘哀

知音難再得且復立徘徊終日不成曲零涕沾裳衣

三歎令人老游子何時歸

其六

燭燭芙蓉花擢擢采蘭婦懷袖忽已盈馨香誰為有

秋草一以萎此物難獨久馳情一水間無因攜素手

其七

搖光加孟冬北風何慘慄寒至疎眾星蟾兔亦早缺

四時既潛移遺跡難獨列不知空牀下蟋蟀安從出

宛洛多故人厚者如膠漆及其據要路負我道弄一

織女無成章牽牛策不發且復守貧賤振翻各有日

其八

浮雲何冉冉亦在南山阿千里遠徘徊游子苦無家

昔我同門友策馬驅高車兩宮屬眄睐冠帶日逶迤

致身及盛時結附一何多極宴累長夜重闌發絃歌

白露忽以零迫此蕙蘭花芳草隨颿塵誰能顧女蘿

其九

獨鵠西北逝逸響一何哀念當生別離欲去復徘徊

不惜寒氣厲但傷羽翼摧我有鴛鴦綺無衣誰爲裁

其十

眇眇織女星當機理紈素牽牛能幾許常爲投杼誤
紈素欲遺誰終日西北顧負輓復何時軒車歲云暮
攬衣卽河漢躑躅不得度

其十一

高樓出西北下有故鄉道浮雲蔽天起回颺響秋草
四時更相至人生自着老傷彼游子顏戚戚難獨好
攜手不須與棄捐一何早努力以爲樂泣涕復盈抱

其十二

東城屬浮雲阿閣百餘尺歲暮多悲風游子衣裳薄
四野何蕭條所遇但遺跡來者自爲今去者自爲昔
盛年奄已衰含意將安適燕趙出名倡紅顏照宛洛
結束隨時變絃歌日相索未彈理懷袖若在遠行客
弄指一何妙列柱一何迫馳情視雙燕飛入王侯宅

其十三

磊磊邱與墳鬱鬱郭北地白日松栢陰悲風四面至
誰能黃泉下永舍未伸意悠悠卽長夜千載一以棄
漫漫待明發迢迢正遙寐身世非膠漆豈得常相寄
此物無賢愚萬歲更相致神仙不可知服食苦中置

美酒與佳人攜手行遊戲

其十四

郭北一極望徘徊安所如
新墳歷歷出古墓附里間
薪者躑躅歌棄妾迴其車
白楊日夜疎蕭蕭悲有餘
三歲去故鄉一字無素書

其十五

處世苦無見孤生非所憂
高言唱同心千載一相求
窮賤解膠漆棄置衰交游
昔我同門友上書哀王侯
明月皎夜光躑躅不得投

其十六

迢迢月既望白露被庭中
越女前理音燕服羅清宮
交遊自遠方文彩復無雙
駕言出廣陵將以適曲江
聊慄此何氣攬觀不可窮
帷車蔽日下萬馬悲回風
水力率已至神物難爲容
秉意屬南山浩蕩惟所從
上客變其度陳唱誰與同
極命以成章娛樂良未終

其十七

孟冬風已厲攬衣有餘歎
獨宿知夜長遠客知天寒
河漢直雙闕皎若素與紈
黃鵠從西南孤飛正漫漫
一鳴緩中帶再鳴霑玉顏
遊子不可聽令君中道還
所以生別離慷慨亮爲難

其十八

客從洛浦至遺我合歡衾中有長相思緣以結同心
芙蓉發文彩鴛鴦厲哀吟遊子正無衣天氣復已陰
故人此屬意徘徊獨至今

其十九

皎皎羅帷月攬之有餘輝寤言守長夜依依未能歸
故鄉無不可道路亦何爲客行各所懷誰知我心悲
出門一以望浩蕩霑裳衣

君子行

君子美百行維日服厥衷車奔不易度火滅不改容
垢言一生口盥漱難爲工金多徒自穢重名撓直躬
幸勿少須臾無替功乃崇九淵可浮游所患溺愚蒙

遠遊篇

乘蹻萬里外言造太微庭雲霞曜朱闕日月夾丹櫺
羣后儼金止仙女紛玉亭隨風列以雨出窈而入冥
沈瀼飛素液芝草不復零虹霓爲我帶雜佩搖華星
濯纓河漢流清波正泠泠俯視世間人汎汎如浮萍

太山篇

大東有神嶽專名爲岱宗日精攝海氣吳野控其峯
明堂朝列后金策紀元功維昔七十家軒轅此登封

雲霞自窈窕石室何青蔥仙人攬玉樹鬚髮生清風
靈液飛潺湲芝草如蒿蓬唯帝擁靈符千載一升中
願言與問道乘龍舉太空

滄溟先生集卷之三

滄溟先生集卷之四

濟南李攀龍于鱗撰

五言古詩

建安體 三首

轉蓬遇回風千里一遨遊良時不自愛汎汎亦何求
西來既迂怪周孔以墳邱患無紛葩名年往非所憂
烈士多壯心對酒苦難酬枕石太華顛俯漱江海流

其二

北風正徘徊繁霜以霏霏經過至朔方惆悵我武威
白骨何籍籍鎧甲貫瘡痍猛獸蹲高岡狐兔失故蹊

伐薪缺斧斯飲冰膠馬蹄遠行多苦寒中路渴與饑
是時一介志悠悠誰當知

其三

河漢懸清光三五正參差西北起浮雲霏霏風入帷
白髮一何早隱約當待誰快獨飲美酒登臺臨華池
趙女蕩奇舞秦箏繁且悲憂來亦有方安得常相隨

代建安從軍公燕詩并引

魏三祖及子建諸子間各臨戎義有紀列
久當逸失不獨王仲宣五篇又公燕一章
應阮侵不就次與仲宣從軍詩過意諷婉

均之未盡所長今各代作二首云

代文帝

長驅下廣陵觀兵東南疆方舟被大海萬騎紛縱橫
旌旗隨波靡組練遠茫茫中流震金鼓士馬何激揚
鎧甲生悲風千里一鏘鏘白羽所漂搖浮雲自低昂
撫劍登高城我軍正相望零雨有遺篇咏言難可忘

代明帝

太常摩回颿旗幟何翩翩屯吹彌故壘列舟竟長川
登檣望四野蕭條無人煙高塘走狐兔荆棘動參天
撫劍下中流甲士羅東西賦詩寫其懷隨波以潺湲

從軍在萬里惆悵私其憐

代曹子建

丈夫志萬里抗慨事四方我后振威靈六軍乃激揚
分旗建東嶽耀武臨江湘鳴鏑控流颺利劍捷秋霜
長驅下淮泗人馬自生光戈矛何參差方舟正縱橫
何言爲國讎一舉披舊疆解徒旆言入歌舞旋許昌
離宮大饗士勞賜以次行君子念在御賦詩垂華芳

代王仲宣

方舟何翩翩素波亦蕭蕭蒹葭澹餘映長檣激流颺
撫劍登高防人馬且逍遙空城何所有殺氣蔽旌旄
日夕見烟火四野飛蓬蒿邊聲起大江誰知我心勞
從軍殊復樂菲薄愧鉛刀

代陳孔璋

浮雲肅四野流颺般悲音邊地一何苦慷慨難爲心
飲馬長城下水寒窟且深白骨撐路出殺氣駕重陰
將建大舉功干戈日相尋騁哉書檄馳縱橫正如林
身在記室中慊慊匪自今男兒念鐘鼎誰能常滯淫

代徐偉長

自我出從軍涉旬東南行文學託後乘顧瞻亦已深
中流萬艘集陶陶層波生淒風旗幟繁秋日戈甲精

沈陰結戰氣唯聞金鼓聲壯士何飛揚各願一先鳴
志已馳九關豈但懷不庭雖君在咫尺搔首未遑寧

代劉公幹

我后赫斯怒整駕東南征六軍如飛集列植龍陂城
皚皚霜風至肅肅戈甲鳴長飆轉沙礫仰視白日冥
流波一何勁金鼓悲且清連鳶下青雲毛血灑隰坰
發機入微妙觀者無不驚壯士以忼慨各奮先登情
釋此薦嘉客濡翰叙平生篇章信綺麗新詩雅以精
小臣在縉幕起坐懷同聲戎事諒非難但恐沈疴嬰

代應

鬱鬱西北雲千里驅重陰臨江大耀土方舟載浮沉
連波響風雨長縲紛悲吟分曹命超距逸氣不可禁
君子在行伍常懷饑渴心非不愧細微良遇日以深
故山何時旋徘徊中自任

代阮元瑜

高城苦多陰秋日殊復悲邊聲薄暮起但見浮雲飛
霜氣勁且繁河漢寒無暉三星何躑躅皎月正徘徊
流颿西北至征馬鳴相依自知從君樂誰能常不歸

公燕詩

文帝

置酒高臺觀逍遙芙蓉池兄弟夜行游貴客鬱參差
明月照長筵羅纓何霏霏翩彼衆君子展詩奏新辭
絃歌入微妙忼慨使心悲流塵蕩清響綺麗有餘姿
吐握苦不悉人生安可爲在昔無樂方彼此同一時

明帝

三五明月滿四七靈宿繁清夜美行遊置酒西苑園
華池濫輕波芙蓉一何鮮飛蓋拂流景隨風自潺湲
主人延貴客竟席列豪賢絃歌徹中堂羽爵騰我前
德音喟有和甘醪發芳顏樂哉殊復樂君豈不俱然

子建

流飈起飛棟羣星集樞軒月出芙蓉池清光滿西園
侍者夜行觴綺綺一何繁玉顏可攬持顧眄屬所歡
華燈正徘徊步障隨風還絃歌蕩層臺激響拂潺湲
公子多憂容從橫各成篇主人自和氏披褐將誰愆
絕纓紛陸離墮釵復闌干取樂此一時嘉會良獨難

仲宣

浮雲撤重陰流焱四座來西臨栢陽山南望銅雀臺
回首出中原曠然千里開公子大置酒絃管間行杯
華燈吐清光飛蓋自徘徊古人一含情于今安在哉
亂離常苦多歡極令我哀

孔璋

羈客心無娛閒居日悠悠駕言侍高會公子招我遊
凱風飄拂鬱素暉蕩清流中庭煥綺樹芳蕤自沈浮
登臺遠顧望高下見原疇肅肅山谷悲黯黯陰氣收
篇章時閒作羽觴不及投逍遙何以立功名為相求

偉長

高臺鬱峩峩其下臨清池黃鵠比翼遊淫魚戲漣漪
微風起水裔朱華紛陸離綺羅旣生色笑歌不自治
旨酒但相屬羽觴隨波移人生寄一世歲月忽如馳
豈忘誦君恩賤軀未可知

公幹

月出西掖垣雙闕鬱蒼蒼白石爛素波蘋藻槩金塘
方舟轉清流飛蓋紛翱翔輕颿灑前庭明鏡敞中堂
淥酒溢尊罍嘉穀充圓方公子多妙製藻思何縱橫
高談自寵珍濡翰安能詳嬰疾日沈痼薄領非所長
願言貽令德侷俛不可忘

德璉

羣士諧佳會置酒君子堂清言解饑渴四座生芬芳
雲雨濯高翼沙石明夜光連篇命音響好合興文章
三臺開藝苑愛客擅詞場伸眉就存慰千載以爲常

元瑜
知已難再遇攬衣及良辰天衢飛高翼清流濯纖鱗
搖落易爲感孰能愛此身恩義不潛暢舉座皆異人
公子善養士中外常所親侍會此高堂羽觴何紛員
翰墨風雨集興文若浮雲翩翩致足樂願言守明眞
效應璩百一詩

殺函命關谷涇渭達黃河終南旣面列沃野開其阿
帝王信佳麗天府鬱嵯峨銅雀鳴雲中員闕夾丹霞
三秦盛西氣小戎乃遺歌揚馬翼炎光流風激頽波
使臣典文字執憲臨羣邪春秋大校士與世陳四科

祇役在末位興言念 皇家筐筭有璽書翩翩爲國
華

感懷 八首

寥寥高秋氣涼風激中庭明星一何的皓月復泠泠
清夜使心悲幽人起屏營羅帷徐動搖丹鏡發寒榮
短歌易慷慨伏枕通雞鳴伴侶稍稍單獨立非其情

其二

四海一流覽爲樂遠何央經傳有依因大雅未淪亡
知名自前代騁翰各專場微音可通靈新辭協宮商
綺麗漫星陳江河鬱縱橫豈不多苦心世士竟茫茫

中原二三子春秋足翱翔離別致倉卒千載不相當

其三

明珠出大海豫章擢青雲宗臣開國功王佐難其羣
公朝日舉士愚者甘不聞披褐玩明時騁翰流華芬
分適中自諧知己俟其真磬折難爲容彈冠各有人
誰令君獨往踟躕失要津

其四

明堂饗元祚稱歲朝京師侵晨宴鸞臺日夕宿蘭池
翩翩佳公子三五相追隨十千平樂酒羽爵何參差
長歌激清風顧眙生光輝秉我徑寸翰興文一如飛
旁人徒嗷嗷匹侶當自知離別難預圖樂往自成悲
仰觀素雪流俯見朱華披棄置安足陳亡沒無還期
百年譬影響倏忽誰能持

其五

在我遊 帝京馮寵私自奇當年值數子無復新相
知中原一顧眙凌厲有餘姿用身常苦拙此志安得
施浮沈託大道四海一棲遲時俗溺鄙議長往不可
追願言反初服白日且逶迤酒中念故人千載爲等
期

其六

鴻鵠不嘯侶鷺鳥難爲儔雙美無常玩江漢故分流
堅芳喻蘭石千載一網繆佳言盈耳哉良時安可留
在昔誇中原數子從我遊

其七

孤行苦難立耿介傷其躬世路有姿態悠悠安所終
美服光照人言笑一何工抱鼓若籟簾磬折如轉蓬
輕薄不可視妖蠱誰能窮車馬從狹邪棘生九衢中

其八

浮雲翳高城回颯生戰場金鼓使人悲旗幟亦飛揚
千載一如此邱隴遞相望奈何轉蓬士翩翩常道傍

酬皇甫虞部

青陽一何麗冉冉西南馳言念庭中樹率已萎華滋
昔我同心友懽宴及良時攜手理清曲各謂無人知
天衢多高足冠蓋自相隨所願不與俱朝親夕生疑
含意戀明世皓首爲君期諒茲久識察紅顏坐盛衰

寄許殿卿

西山匿冬日北風悽以繁念茲歲方晏徘徊白雲垣
俛首事尺牘儋石聊自存悠悠塵中心夙昔非所論
感彼碩人情獨歌矢弗諉庶此涉時艱遂用安邱園
路傍磬折子高足策華軒咄喑金蘭客來當蹈斯言

賦得何仲默

仲默自天秀弱齡負遐矚十六遊京邑藝苑策高足
揮毫坐華觀懷人理清曲歸來放情志日晏從所欲
結好玩遺芳明德以相勗古道諒寡諧遂令傷局促

五子詩五首

王元美

元美何翩翩夙昔秉靈異京洛多冠蓋操觚各自媚
所遇無此物識曲聽其偽大雅久沈邈時消作者至
俛仰知音稀含茲未伸意但坐奮逸響側身向天地
虛名喜誤人依依千載事浮雲相攬持白日一高視

四顧命儔匹中懷誰可致凌厲子長氣文章此未墜

吳明卿

吳生蕩滌士明德復何早高舉凌風翮青雲濛浩浩
良時冠帶會斗酒弄辭藻一彈中清商下里難爲好
知音率已稀隱几存吾道衆言紛盈庭膠漆各自保
掩耳走淆亂褰裳度潢潦罵坐豈盡狂流俗令人老
陸沈金馬門懷袖諫書草白日有棄捐遊子悲不造

宗子相

婉婉維揚士早歲絕人識結撰有至思先民乃遺則
時俗徒嗷嗷此物知者得鬱鬱獨往心百折江河力

披覩他自媚我意安所測念茲攜手驩榮名與令德
浩蕩陰陽移吾道相終極語及千載事愀愀動顏色
中懷誰可喻文章亦經國一爲麟鳳言三歎加餐食

徐子與

徐生一何俊本自青雲姿十年住天目含意多素辭
旣聞風雅音三歎文在茲眇昧生榮名徙倚卽前綏
念爲理清曲高言倡者誰躑躅流俗間攜手不相疑
時髦滿要路各謂中心私世人豈同願吾道欲委蛇
黃金買大藥朱顏庶可持物理率如此和光難獨窺

梁公實

梁生起南海負氣何倜儻北交中原士徘徊得吾黨
高名豈宿著一朝奮鴻響時俗旣淆濁振衣念獨往
禮法難爲工局促向天壤王喬可等期服食理非枉
引領還羅浮願言稅塵鞅俯視大河流逶迤浮雲上
盛衰隨物化世情自鹵莽吾意當告誰黃金妬偃仰

二子詩二首

盧次梗

盧柁起河朔本自千金子蕩滌諸生間銷骨於積毀
世無臨邛令焉得心尚爾深文類繆恭罪罟中狙喜
乃繫黎陽獄十年攻一技旣出浮邱賦始知有株累

三嘆不同時帝曰付諸理寥寥相如後誰能識察此

謝茂秦

謝榛吾黨彥輒軻京華陌黃金自不留朱顏亦已擲
韋布豈盡愚咄嗟名士籍握手金閨人中情多所適
冠蓋羅長衢染翰日相索遂令清廟音乃在褐衣客
一出遊燕篇流俗忽復易還顧望鹿門矯矯青雲翮

酬元美 二首

妾本秦宮女少小揚蛾眉早辱君王寵朱顏驕自持
卷衣皆羅紈明珠縱橫垂頭上翠琅玕爵釵珊瑚枝
盛年處深殿容華六下知一朝在里巷遂爲生別離

此身託古歡南山猶可移東隣蕩子婦泥沙委路歧
中心指秋日同穴乃所期

其二

有鳥名黃鵠乃在琪樹柯下來太液飲唼喋苻與荷
周游視中土少年多羅家金衣菊爲裳不受贈繳加
一舉絕四海離哉天可摩毛羽未摧頽鼎俎奈爾何

再答元美 二首

盈盈猗蘭花深谷何透迤秋風凋奇樹隕穉以蕨蕤
含英卽蔓草不復揚華滋豈無王者香結根非其宜
孤生感霜雪采折中心知幸君置懷袖慰此長相思

亭亭西山栢自茂凌寒姿下流難久居壯士多所悲
采苓首陽巔青蠅止於棘結髮奉歡宴栢舟矢靡慝
上堂理琴瑟下堂視蠶織昵若形與影在遠復相憶
豈不防未然萋斐成罔極愛深生百憂棄捐衢路側
賤妾抱區區中道蒙察識琴瑟聽其真蠶織五文色
非君膠漆心羣小志亦得

郡齋同元美賦

遊子苦行役驅車自溟渤依依平生親斗酒日云沒
秋風亦已厲蕭條衆芳歇何以贈君子徒倚覽明月

燕婉當及時霜雪變華髮高足蔽天衢浮雲望雙闕
令德一見疑積毀能銷骨中懷不復喻逸若胡與越
綢繆有故人知音無倉卒常恐遠別離含意向明發

送元美 二首

有鳳銜靈文栖栖北海湄臨流理毛羽五采以自奇
飛如摛羣星擊若朝霞披翱翔千仞岡亦集梧桐枝
一鳴叶清廟再鳴中咸池淒風振大野青雲顧我悲
世無伶倫耳誰爲度參差回首顧丹穴摧藏不可持
將止帝東園恐令鷓鴣知阿閣在萬里哀號乃見疑
啁啾榆枋間燕雀相迫隨清光蔽白日何當復來儀

其二

夙昔二三子，忼慨揚奇聲。文章凌先秦，詞賦無西京。
零落如流星，各懷饑渴情。念爾策高足，北海日以清。
顧眄當中原，冠蓋徒縱橫。明發詠蓼莪，依依戀所生。
悲風薊門來，涕泣霑我纓。解帶謝時人，驅車薄姑城。
千里見大河，躑躅浮雲征。罷酒不能別，蕭蕭駟馬鳴。
骨肉非一身，意氣乃合弁。景光老自愛，幸已識榮名。

答寄俞仲蔚二首

太乙貺漢德，名駒生渥洼。赤汗霑青雲，長嘶振流沙。
饑斲玉山芻，渴則飲其涯。翹尾以躑躅，駟駝相經過。
不願游閭闔，况乃服鹽車。世豈無伯樂，垂耳奈我何。
天子發素書，使者出蹉跎。駢駢十二閑，駑馬常苦多。
雖有千里姿，羈絆非所加。

其二

鬱鬱龍門山下，臨千仞谿。孤桐生其間，幹與浮雲齊。
湍水擊其隈，迴波蕩其涯。野火燔其東，飛雪塗其西。
莫則止黃鵠，朝則啼鷓鴣。悲風從天來，清商以淒淒。
伯牙不能去，傾耳中自諧。匠石空扼腕，運斤路何階。
琴瑟和神人，無乃非其懷。結根旣已異，雨露難獨乖。
願言俯大壑，往就長離棲。

送李明府入奏

西北夏雲列飛蓋亦相望供帳被城隅父老皆扶將
天子秉百度作新大朝堂棖桷曼且碩掄才自南鄉
山河俯壯麗肅穆垂衣裳是時薰風至五月開未央
既奏解慍曲或和斯干章 聖顏慰饑渴 帝心簡
四方冢宰上績書召見伏明光用等課高第視事稱
維良小臣奉威靈不得施其長誰謂一邑輕治行乃
無疆願言備侍從珥筆述陶唐策勳諒有期遺愛匪
可忘

許殿卿郭子坤見枉林園

二首

明時再嬰疾曩官此悠悠永言命沮溺二子乃從遊
田家何所有樽酒結綢繆散髮坐園中轆轤牽寒流
擊我青門瓜聊且克庶羞雨氣蕩暄濁披襟御南樓
開軒納山色餘映一以收雲霞羅四隅烟火蔽林邱
伏陰秀禾黍餉婦媚原疇西望華陽宮若見清河舟
登臨信亦美曠然銷人愁願君愛景光多暇還相求

其二

佳客卽良夜此會安可期結髮爲兄弟晤言今在茲
層臺挺浮雲河漢宛其垂積陰濯列宿三五正參差
前山殿影亂雨勢坐已移皎月出平陵徘徊當照誰

清光澄暑氣颯若撤長帷潦水明樹間流颿澹華榭
零露響空林蟋蟀以鳴悲世路良獨難斗酒多所宜
達人忌榮名千載同一時

杪秋同石史南山眺望

南山有幽意駕言此徘徊湖波蕩寒城四座清光開
金天澄素景秋氣何悲哉繁陰遞白口浮雲間往來
落木颯中林流焱激巖隈朝昏上煙火原隰被樓臺
故鄉無滯淫世路多塵埃念我平生歡離思壯難裁

九日集殿卿池亭分賦

二首

卜幽命詞客冠蓋至如麋白雲澹蕭晨黃花媚新醞

灑翰湖山清開樽魚鳥近零露偃池荷淒風攜籬槿
徑回片橋出林暝寒城隱臨流濯長纓飄然祛塵坌

其二

寒空鵲嶺秀霽野湖水闊墟落散城隅池亭入幽豁
雲陰出水鮮石色含霜活白鳥下煙際歸鴻起天末
返照款長林羣流亂相聒紫蟹壯可持濁醪美堪掇
秋高吹臺典老劇文園渴佳節有獨醒吾生豈云達

集張使君別業

清河迅寒流金輿杳空翠秋氣下高原蒼然西北至
返照散疎林蕭條烟景異零落復佳期茅茨况幽致

海海集 卷之四 七
握手平生人笑談
出往事舊游數子盡
風流吾黨備
千金抵白髮
一醉滿君意

秋夜白雪樓同許右史襲茂才分韻 二首

林烟旣曳綃
湖霞亦披絳
雞犬靜荒村
蓬蒿翳深巷
燒微見月出
鐘清識霜降
各稱浮白樂
未覺呼盧戇
更賦梁園雪
如流華渚虹
預愁還城邑
車馬紛相撞

其二

返照入平陵
白雲出西隴
天清鴈影澹
山空嵐氣重
三徑何蕭條
高人乃接踵
諸生稷下秀
詞客梁園寵
松菊有佳色
琴樽亦慙憊
但醉不須眠
寒燈坐相擁

送許史得弟字

秋風一蕭條
白雲自相綴
翩翩爾曳裾
慘慘吾分袂
鼓楫大河流
揚帆下衡衛
平臺壯登眺
鄒枚儼兄弟
旣出兔園篇
頗兼子虛製
詞賦有知遇
王門卽恩惠

集開元寺

流陰拂層岑
返照翳深谷
古寺入蕭條
迴巖抱幽獨
梵影淨香臺
鐘聲殷石屋
絕壁棲禪誦
懸厓下樵牧
秋花雨還瘦
老樹霜逾禿
寒泉可瑩心
白雲况極目
登臨客自佳
搖落時何速
蔬色蕩腥羶
苔光清簡牘
新詩發神秀
舊游耿初服
歸來杖屨便
老去煙霞伏

高城出睥睨燈火通林麓言旋轉多興後期此同宿

答張秀才問疾

青陽蕩積晦素雪亦云熙仲月陶嘉樹閒庭暖流滋
微風中夜興清光動遙帷殘燈出四壁鐘鼓一何癡
閉關抵百役內熱耿于羅養痾終年歲人生能幾時
服散代晨餐七箸厭相持哲夫秉大觀一往不復疑
所愧乏明德盈縮無常期

寄題離齋園 二首

芙蓉媚昭質初服一何好繁霜日夜零悲風起中道
鷓鴣既已鳴所遇無芳草馳騫終年歲紅顏足用老

美人怨遲暮迴車自不早蕪穢沫榮名同心以相保

其二

蘭生有幽性零露峻其姿含芳在空谷清風來御之
孤根亦何傷衆草故難爲萎絕同糞壤中情君豈知
願言置懷袖延佇及良時荃茅一以化奈此菜與施

贈元美兄弟

唯帝饗金石拊髀封疆臣二子越枕戈避讎棲海濱
及時列冤狀含意遂俱申乃望漁陽戍北風飄沙塵
若見姑蔑旗陰雨施威神吳門有邱隴舊與要離隣
陳尸赫中寢國命委荆榛楚王黜費氏棠君紀人倫

何如上公服寵光祿所親願無廢前勞報恩致其身

虎跑寺泉

大士始結構鑿空偏此邱二虎自南嶽掉尾從師遊
神威攫地脉佛力驅陽侯枯火迸石罅松根解綢繆
勢寧決蹻去揮錫怒不休至今噴巖壑水猶咆哮流
酌言生壯心一嘯風颼颼海眼在其下潮汐故可求
不然胡僧呪爭使波瀾浮穿壁吐長澗夾寺瀦龍湫
疑作故山雨片雲駐岫嶻歸應出東林無爲惠遠留

求志園

吳門有奇士二弟偕好脩鞍馬照紅顏往來長者游
帶劍何良綺垂纓亦綢繆豈不攬豪賢我志非所求
駕言旋北郭灌園依一邱白雲蕩虛壑餘曠翻寒流
置酒臨高臺邈焉懷其儔鴻鵠旣云舉千里常悠悠
清風動帷幕皎月光沉浮讀書見古人鳴琴調逾幽
無取廣川觀昔在漢陰叟天子御飛軒龍蠖時乃
瘳回首望中原壯心未可收

子與至武林

良時能自至嘉會無常期長飈吹浮雲奄忽東南馳
依依曳景光泠泠發餘悲非君命儔匹游子安可爲
大江折其流武林愴以摧念今在往路執手野徘徊

何必同一身中懷貴不疑彈冠有逸響駕言卽前綬

古意寄德甫 三首

悠悠我行役往路殊未央春華不須臾奄忽踐嚴霜
安知疑與喻風波起塞裳浮雲邈無所游子依故鄉
長當遠離別何必復彷徨鴛鴦自踟躕黃鵠已翱翔

其二

嘉會在俛仰良時不可留悲風自遠至大江以悠悠
中懷有白璧千載爲一投飛龍雙欲垂胡馬羣相求
徘徊視四海含意各未酬念此平生親從彼浮雲游

其三

明月照我牀清風感重闈遺書發懷袖彷彿見容輝
古歡匪自今游子當何依千秋一高唱豈獨知音稀
莫言苦行役極寔不如歸努力兩黃鵠爲爾故鄉飛

贈德甫 一首

豫章生庭中結根西山隈江流一蕩涵悲風千里來
絲蘿謝依託冰雪抱崔嵬非不曼且碩時無栢梁災
截爲玉女瑟絕勝龍門材展我清商曲彈作臨高臺
洪厓頷願坐五鳳鬱徘徊

灌甫東坡宴

王孫古城隅東坡託偃仰回薄始翫雜高臺忽峻敞

風波一以交淪漪恣遐放列雉翳中流返照幕魚網
曲磴盤層陰清房殷清響並逸金谷韻兼詣濮陽賞
板台戒隆曦披髮命吾黨美酒滌煩囂冷言發神爽
至今河朔人垂聲得倜儻直置病游梁爲心任獨往

滄溟先生集卷之四

滄溟先生集卷之五

濟南李攀龍于鱗撰

七言古詩

送靳潁州子魯

華陽館前桑葉飛荆軻臺上送將歸爲言擊筑悲歌
者當時酒人今是非太守褰帷薊北來燕山忽斷楚
天開郡中曉月雩婁出霧裏秋濤桐柏廻黃金璽書
發明光東走潁州西豫章君家兄弟二千石承恩不
數尚書郎朱轡雙出領專城五馬踟躕五馬行漢主
乘春徵計吏小馮何讓大馮名

送新喻李明府伯承

爾昔紅顏客薊門獻書不報哀王孫一朝致身青雲裏座上還開北海樽余亦題詩郭隗臺燕山秋色對銜杯論交共惜黃金盡此處空悲駿馬來可憐郢曲今亡久下里之歌吾何有文章稍近五千言雅頌以還十九首才子新傳白雪篇江城忽借使君賢那堪西署爲郎者多病離居卧日邊

贈張子含茂才

憶昔中丞全盛時少年裘馬相追隨忽逢世變夙心違逆旅荒涼舊識稀古來萬事皆如此何用空悲昨是非流水無情白日速紅顏猶在黃金微飲君莫辭燕市酒欲行不行重攜手青雲今有故人存好贈綈袍哀王孫

刁斗篇

陰山戰合胡天黑漢兵大呼單于北邊秋日落五原屯磧火夜連千竈食驟騎橫戈拂鐵衣悲風黃草白榆飛渡河鳥陣旌旗伏卧壁龍沙鼓角希征人馬上援枯骨滿地清霜刁斗發朔氣遙傳瀚海雲寒聲亂動輪臺月掩笳騎虜聽垂泣按劍材官怒指髮宮女琵琶咽逝波使臣旄節彫幽窟誰能絕漠掃妖氛哀

響如今不可聞六郡少年思轉圜
擬金猶憶李將軍
送張子參募兵真定諸郡

薊門昔在胡塵中匈奴火照西山紅
檀廬相望赤縣隘腥羶未厭神畿空
君王拊髀過郎署侍臣扼腕談邊功
每飯不忘鉅鹿戰千金先發華陽宮
邯鄲少年游俠子腰間匕首懸秋水
出身願屬羽林兒橫行誓奪單于壘
騰裝夜別縱博場貫酒朝辭挾瑟伎
馬上風雲八陣成帳前鼓角三軍起
故人新貴寵軒墀亂後高名衆始知
國士漸看投筆至主恩況許請纓纓
爲天寒恒嶽倚長劍雪滿滹沱擁大旗
歸來漢苑生

春草見爾論兵散幕遲

齊俠行

簡書八道發明光詔徙羣豪赴朔方
神武臨軒耽虎視將軍秉鉞鬱鷹揚
山東十二諸侯國海濱五百義士鄉
厭亂齊臣思定伯殷憂漢使出勤王
敵驕擬縱田單火客憤能飛騶衍
霜設騎人人白羽箭民兵處處綠
沈槍九河寒色旌旗動岱嶽秋陰
鼓角長各倚少年輕燕頷曾經遣
戍守漁陽被髮左衽豈受賜排難
解紛不可當往歲潢池先陷陣三
時大戰銀冶場功名未致有莊賈
肝膽欲傾無孟嘗天子只今顧西

北男兒俠骨埋邊疆

賦得金谷園障子

誰將金谷傳毫素座上無人不回顧乍展旋驚澗水流纔開已識河陽路四壁真看片錦圍中庭如見雙鬢度移席休臨墜妓樓解衣欲掛沙棠樹彷彿明妃出塞吟聽來未必梁塵誤詩成酌我我豈辭便過三斗無論數絲珠安在恰當壚似畱且往勢可呼意慘崑崙紫窳窳色寒滄海紅珊瑚君家富貴合如此此時那知有障子縱然客散掩空堂猶聞夜夜春風起

送申職方謫萊州推官

嫖姚三疏奏明光九月王師掃大荒不求十萬羽林騎從軍但請尚書郎看君未是侯門客草檄論兵一當百片言不合徑拂衣坐使元戎氣蕭索漢主臨軒送逐臣褰帷海上及行春正逢匹婦銜冤雨一灑浮塵不汚人遊燕曾攜短七首袖裏虹蜺今在否出關若見棄繻生爲余持贈單于走

送趙員外行邊

狐白之裘紫驪馬鳴邊東走漁陽野自言天子授長纓明光殿前三使者飛檄遠度桃花山昨日遼西校戰還吹律春風回黍谷揚旌暮雪灑榆關關門一

望煙塵色抵掌志馳伊吾北豈獨秦人重繞朝誓令
羗虜避克國此行不按督亢圖欲畫地形取匈奴指
揮千障鐵如意出入雙韃金僕姑驃騎將軍綠沈甲
鷓鴣大夫黃石法磧裏兵屯種玉田雲邊燧起彈琴
峽元戎幕府贈吳鈞太守離歌岐麥秋看君歸奏稱
上意何足道哉萬戶侯

賦得狼居胥山送李侍御

材官十萬絕大幕踰河一戰胡兒却夜縱翼兵襲章
渠繫以往封狼居胥姑衍山頭列旗鼓中壇擁纛陳
首虜帳前面縛三當戶驃騎將軍醉歌舞北風千里
雲摧頽瀚海波濤蹴日迴漢家天子雄才哉捷書親
發柏梁臺君持繡斧五原郡牧馬單于不敢問黃沙
白草寒冥冥今年爲王犁二庭

送徐汝思郎中入蜀

岷江東流何渺茫仙舟西去指華陽峽深當晝暗雷
雨白帝青天豁大荒一望峩眉山上月風吹寒影墮
瀟湘益州部裏占星使草色春時接夜郎客將河漢
支機石歸自乘槎厯七襄萋弘碧血埋難化杜宇啼
魂怨未忘胡不爲我排闥闔願君致之北斗傍卽今
叱馭九折坂金精元氣參翱翔雪峯突兀三飛梁中

掛鳥道通蠻方司馬長卿子虛賦其文可以凌太蒼
臨邛小監楊得意亟薦詞臣謁建章後來此事益寂
寞煙塵萬里遙相望

葉舍人

舍人家世稱儒素供奉班聯起居注仙郎盡識鳳凰
毛父老相傳驄馬步當日蘭臺抗疏還讀書高卧柳
亭山至今猶憶張文紀年少官微犯帝顏聞君夜入
蓬萊直歸夢時時動秋色翰染金莖彩露寒廬開玉
樹青天逼回首南雲春事繁浮邱峯下小桃源他時
搖艇新安水坐把江花醉故園

送謝茂秦

孝宗以來多大雅布衣往往稱作者謝家玉樹操郢
音其曲彌高和彌寡寓梁曾曳王門裾遊燕欲薦中
涓馬豈無冠蓋映當時滿眼悠悠世上見文章千載
一知己交結何須鍾子期此物有神兼有分富貴浮
雲不與之盧楠坐銜越石恩醉後感激肝膽言蒼鷹
睚眦鸚鵡賦身挂羅網何由翻般憂楚奏秦庭哭遂
雪黎陽國士寬歸去東將釣滄海安能貧賤常邱樊
早借江鴻報消息或卧春雲且故園

送太醫令周一之從大將軍出塞

武皇按劍明光宮夜發材官六郡雄臨軒親遣上將
軍誓掃匈奴成大功白羽九邊傳漢月霜戈千里排
胡空轅門豈聞天子詔帷幄寧多策士風書記翩翩
爾其選志勒燕然禪姑衍業許原嘗念已深情憂平
勃交仍淺藥囊每擬提荆軻驄馬何曾避桓典淮陰
惡少舊相輕朔方健兒知姓名身爲揖客元戎府意
氣秋高出塞行二百年來無一戰今日王師遂北征
便當滅虜始朝食不繫單于不解兵

南溪老樹行

老樹橫溪十畝陰下有跳波二百頃酒罷捫蘿坐其
上白眼青天何不逞斗牛之間見浮槎蒼茫宇宙成
漂梗念我平生湖海客衣裳泠泠風馭冷文章八代
俱望洋心事幾人同哀郢醉裏誰堪此陸沈俠來氣
與千濤猛洛浦明珠舊寂寥渥洼神駿空馳騁翻然
大叫觀者摧那知世路滄洲永投足還探河伯宮俯
身欲拾中流影驪龍蜿蜒垂霧雨虹霓繚繞含光景
須臾力疲神亦眩乾坤低昂發深省最奇披髮泗呂
梁願言洗耳臨箕頰初看長駕出龜鼉豈云吾道終
蛙黽王郎驅石到渤澥徐子招招廻舴舻此時共濟
失狂瀾却悲胥溺情難整泥塗詎可困豪俊男兒相

逢誇項領遂憶鳴鞭昨夜歸湘娥漢女猶延頸羣靈
至今未敢散寒江颯颯開塵境

送公實還南海

梁生偃蹇誰與倫梁生偃蹇無與倫爲郎十月不厭
意上書乞歸南海濱文章往往近時好富貴安得嬰
其身獨存肝膽論交者一一凌雲作賦人憶昨擊筑
飲燕市酒酣以往氣益振黃金之臺空嶙峋華陽之
館摧爲薪駟駮駮耳俱良馬劍客博徒皆俊民梁生
徐生情最親宗生王生詩更新經過但坐歌白雪罷
曲彷徨若有神揮毫夜夜搖星辰襟期矯矯何能馴

梁生此事成萬古欲別牽裳遂具陳羅浮之山何崔
嵬下臨莽蒼波濤開維舟跋浪長鯨出倚杖垂天大
鳥來北望中原寥廓哉飛厓坐攬百粵色羣峯黝渺
行風雷梁生之廬構煙霧千尋薜荔青摧頽有時高
咏反招隱巖壑無人秋雨哀尉佗椎結本趙俠陸賈
縱橫亦漢才丈夫有道在龍蠖還能與世相裴徊梁
生何爲終蒿萊梁生慎勿終蒿萊

擊鹿行

并序

余往與王生過子與見伏鹿於庭戲相謂
曰余將攜徐夫人七首刺此鹿麋腊之也

生豈不願爲我犄角之哉又與王生過子
與則子與刺殺此鹿食王生旣而宗生亦
至相與批脯飲也亦大豪舉哉乃各賦擊
鹿行壯之矣

徐卿意氣殊不偶買鹿百金求其牡華堂燕客忽自
放醉把邯鄲鐵七首須擬麟從帝藪游未聞鹿觸何
奴走高材吾黨復誰過文章矯矯驅羣醜失日難將
四海求逐來定死諸公手毛灑旋疑霜雪寒角摧更
見珊瑚朽王郎大叫奉銅盤接飲其血軟以酒顧我
前呼慙下生與君相愛爲君壽舊時疾足今能否安

得新詩滿人口須臾碧眼胡兒至落礎脯腊無不有
下箸已畏翠釜空纖羹更出青閨婦衆看枕上肉如
陵覆蕉尚在隍中守嗟乎曲士夢何久徐卿獨醒可
與友

送元美

王生二十趨明光是時作者不可當世上之名他自
誤須君千載垂文章夙昔陸沈秋憲府風塵慘淡尚
書郎心知此物難再遇片語論交燕市傍攜手七陵
朔漠色悲風九月吹白楊居然宇宙見雄俊睥睨今
古神飛揚流俗紛紛失肝膽那能結客聲利場近日

操觚滿京洛江河決注非其長家握靈珠戶和璧及
逢周客皆深藏高才榷楠與杞梓吾道麒麟或鳳凰
清廟遺音壯 昭代天庭火藻懸衣裳生也經綸斯
濫觴混塵安取金躍冶養銳更羞錐處囊伊周屈宋
儻易地鈞衡藝苑俱稱良生也爲情誠彷徨但願右
挹擊筑之荆卿左拍接輿之楚狂二豪侍側乃螺贏
四子講德如蝸蟻舉觴白眼天茫茫秋風胡爲歸故
鄉亦欲送生從此去畱生不佳悲河梁彩虹千尺挂
碣石贈生千里爲帆檣

楊山人 四首

茗溪之水何泠泠吳山一峯天目青千林萬壑子雲
亭從他世人還解事白頭不厭太元經

其二

吳門市卒能逃名長安貴人非其情南山薄田春自
耕盛世爲農亦足老少何用隨諸生

其三

千筐湖綿白雪開滿江稻色黃雲來山中客醉領其
頰自言七十巖耕者帝於我有何力哉

其四

長裾不爲王門賓千金盡散江湖人菰城一卧三十

春看爾紅顏逐燕雀終然白髮行風塵

送子相

自作白雲郎未厭滄洲意偶然薄祿混風塵論交千里賢豪至元美翩翩多奇氣南越梁生亦雄視二子招攜從此逝爾今卧病緣何事綠鬢還鄉已壯遊錦帆十月下揚州移家好住昭明樓種瓜莫羨東陵侯文章萬古垂大業富貴浮雲非所求知君林壑百不憂圖書四壁高枕秋世人那識淮海士須行便爲名山畱丈夫義豈辱顏色使我摧眉去卽休安能訾呢向權勢咄咄空令達者羞夙昔竟寥濶後來復泱莽相看一別雨墜天他時神劍來精爽旣言郊藪走麒麟鳳朝廷寧得無吾黨卿也抽簪且偃仰漁陽日影黯如壓薊門雪花大於掌馬上燕歌變徵聲壺中酒盡君當往

俠客行爲子與贈吳生

本自吳越冶遊郎結交燕薊少年場長裾不曳朱門裏樗蒲大叫青樓旁被酒目攝羽林騎擁金作使邯鄲倡弟畜灌夫師事田光得意一言失意一言相怨一方相慕一方男兒過逢好驚座世事握齷寧陸梁姓名何惜借輕薄出處未須論侯王親知猶向隅有

錢徒充囊籩家猶戴天有客徒滿堂猛虎可值俗子
莫當平生片心照秋水明日報恩還故鄉

留別子與

從君幾醉燕京酒舊遊花月回白首相看零落眼中
人二子河梁重攜手憶昨青山坐西署于今此事成
不朽交態蕭條爾自諳浮名慘淡吾何有爭道賢豪
擁上林華陽臺館盡黃金長卿詞賦徒壁立曼倩佯
狂合陸沈平生得意向知己常將顏色當同心北望
諸陵一拊髀悲風千里來寒陰春草如雲覆四野我
行透遲五其馬十載爲郎願已違出門况復悠悠者

漢臣猶未老馮唐每飯豈忘鉅鹿下歲晚江湖夢獨
遙秋深鴻鴈書堪把

題申職方五嶽圖

誰將五拳石錯落余之堂坐看素壁纏雲霧安得羣
峯掛屋梁更愁深林暝難入嵐影明滅侵衣裳左眄
欲生滄海日右臨少昊凝青霜掃練白沙走朔漠回
毫紫蓋垂炎荒須臾二室峻嶒出杳然置我烟霞傍
不聞吹笙控飛鶴浮邱子晉俱冥茫良工拓筆天爲
開長風西逐層陰來中庭無人數移席巔厓乍墮松
杉摧眼前突兀太古色九州慘淡如浮埃宓犧神農

未誕降元氣始判洪濛哉大江浩浩黃河流巨野相
望懸莫秋異代猶探秦漢策真形或結金銀樓憑軒
忽驚去千里青鞵竹杖胡在此復疑窈窕迷歸路何
當稅駕聊徙倚捲簾逾添空翠寒張鐙更愛夕陽紫
邢襄小吏困時名知君雅意憐泥滓

送永寧許使君

二首

邢州十月凋白楊城頭出雲垂太行把酒相看日欲
墮五馬踟躕大道傍問君胡爲萬里去小臣罪合投
窮荒我聞西南羅施國風氣鬱塞殊陰陽長官椎髻
見朝吏海蠻醉鼓橐中裝男兒貴至二千石何地不
可稱龔黃壯遊須令百粵盡探奇更得浮沅湘永寧
自惡無瘴癘明年雨露生還鄉

其二

使君落魄高陽徒結交李生仍狂夫醉後裂背一相
視怒髮上指浮雲徂白日並堪出肝膽黃金誰爲收
泥塗長安少年太巧宦依倚權門何事無失策始就
公府辟得意豈領蠻夷符爾今折腰揖下吏我更掩
泣臨窮途奇數能令遇合變美才常被功名愚武溪
毒淫須自愛九重沈深不可呼憶昔終軍繫南越鄉
里小兒何其麤荒服盡霑大漢德單車入郡歌來蘇

固知永寧之州纔如斗天子求賢三輔圖儻有徵書
到遷客五馬好過秦羅敷

送王給事使路

憶昔胡塵暗薊門六軍如雲集闕下天子授鉞臨軒
檻宜陽王公其人者風流舊出城朔方簡在新除大
司馬是時將帥實跋扈傾耳履聲入北斗引經答詔
動稱意草檄提兵常在手帝力自堪制閩外股肱佐
命吾何有一從誅亂朝廷清四海亦重尚書名看君
少年青瑣客漢家今得韋元成袖裏彈章百不避囊
中諫疏垂欲行主恩三晉持節使上黨諸侯帶礪
功泛槎春度濁漳水設醴夜宴虎祁宮歸來煉石補
造化論思庭諍才何雄

郡齋同元美賦

夙昔紅顏一大夫乘輅河朔何爲乎除書歲下不得
調鼓其刀筆寧壯圖帝恩初欲存折檻謂爾祝網
從皇都相逢但飲邢州酒太守況卽高陽徒庭前秋
色正慘淡囊裏新詩復有無醉歌出塞雲中曲朔氣
颯沓來飛狐路傍小臣久汨沒安得座上開江湖眼
前大雅竟誰是作者如山道各殊更須一日論萬古
揮毫振臂羣雄呼維時海內稱二子高名自喜王生

俱白雪青天動蕭瑟臺郎郡吏同崎嶇楚璧照隣不
敢獻蛾眉在宮還自塗王生仰視浮雲徂矯手將我
領下鬚與君周旋在今日還能百萬來長驅忽然神
氣回莽蒼孤城搖落相踟躕

跳梁行寄慰明卿

武昌季子吳國倫左遷三載匡廬春紅顏便着風雲
色白眼豈是功名人邢州太守昔入計猶自金閨侍
從臣顧問片言搖日月彈章一字動星辰雖然舊屬
平津吏常苦跳梁不可致調笑縱橫倒四筵交驩往
往非其意世間那得郢中歌君但論詩吾且睡何須

更比謝生肩但應獨把王郎臂蕭條頗似東方生南
康郡裏憶承明文彩縱然傾漢主恢諧難以取公卿
畫眉石鏡二女保濯足長江九派清此兒尋常未易
識偷桃賣藥行妖精近來猶尚憑陵否俯仰浮沈無
不有朝讀司空城旦書夜沾茂宰柴桑酒成敗寧關
達士心卷舒終在朝廷手隨他肉食作雄飛饒我褐
衣稱下走黨禁重開祝網年一時逐客寵光偏晚收
已抱泥塗恨更謫如何不可憐事急誰能馳叩闕家
貧未擬罷歸田再來地僻逾高枕就使荒涼給俸錢
壯遊萬里君須見青瑣鳳池元不賤使氣能令魑魅

藏出身曾厭櫓槍變楚狂豈止接輿賢秦孽猶堪背
城戰回首畏途真自知一官不絕纔如綫難將此物
鬪翔翔妬口含沙未可當四海弟兄堪並起中原我
輩正相望總看棄置風塵裏不作踟躕道路傍鼓柂
更逢漁父笑豈應憔悴老滄浪

此兒行重寄明卿

我聞南康大如斗明卿佐理常什九昨日中丞抗疏
薦賢聲輒滿朝廷口豫章計吏入圖事愛君未敢援
以手小臣憐才上白狀相公良久疾其首量移亦已
從浩蕩不然徑逐此兒走誰知片言觸忌諱畢竟功
名成掣肘丈夫失意分自當窮來傍人人避藏苦我
折腰骨太勁看他伏謁項能強縱令慢世無不可似
爾干時豈所長莫作拂衣少年態宦遊須使及春陽
大舒楚歌小舒舞是處江山好斷腸王郎至今棲北
海帳前萬騎綠沈槍

拂衣行答元美

五原驅車興殊淺三秦卧病秋云高束帶那能見長
吏談經何以隨兒曹上書一日報明主願乞骸骨
歸蓬蒿小臣采薪業不佞聞道巢由亦已逃拂衣中
原風雨來羣公祖帳青門開二疏一去三千載大夫

未老寧賢哉新鄉城西重回首當時叱馭其人走路
傍伏謁莫敢動囊裏俸錢君但取此輩交情雖可見
吾徒大名終在口于今偃息南山睡閉戶不令二仲
知負海少年大跋扈遣使問我抽簪期百爾不分一
狂客余髮種種何能爲元經半卷常自誦濁酒千鍾
醉不疑五子江湖正漂泊黃鵠摩天慕者誰

答許右史 二首

黃鬚芘芘田舍翁傾身坐向錢孔中長頰便便美少
年行步顧影私自憐誰知腐鼠能爲祟縱是神仙有
播遷使君似識浮雲意蹉跎實爲功名利己拚酒隱
當吾世潦倒佯狂百無忌濁醪恰供十日飲酣法須
與常時異五斗乍可調燥吻飛觴一子雄相視醉殺
不作傲盃人邇來那得獨醒事魏文大白滿如月曾
託屬車稱國器若言此物非其任爾家破瓢亦應棄

其二

王門隱者身坎坷老曳長裾裾婀娜自言能料一生
事及至干時計常左從它慘淡復爲誰卽得新詩題
向我雨雪蓬蒿共三徑春色傷伶餘藥裏濁醪但熟
貧亦足微官纔罷病輒妥胷中壘塊故須澆乘興往
來無不可白眼生成薄祿相青山合就漁樵夥趙壹

疾邪衆所擯鄒陽暗投才應坐羨爾悠悠世上情回
頭數子殊么麼

送萊蕪蕭簿

蕭生業本儒術起稍因讀法得其指栖息十年白鹿
洞擔囊一卷青烏子岱宗雄蟠大海濱衣冠氣玉中
有人我家松楸三千樹鞍山東望華不注爲說千時
常轍軻獨憐 明主能知遇萊蕪作簿更誰羣但恨
無過范史雲釜裏蠹魚堪自見鞭下蟲蛆詎忍聞看
君才豈催科拙請謁公門非所屑藩臣答詔誤承恩
飄然遂就遷官列匹馬悠悠復路岐卽今失意欲何
之同鄉冢宰諳名姓府掾卽曹佇可期

歲杪放歌

終年著書一字無中歲學道仍狂夫勸君高枕且自
愛勸君濁醪且自沽何人不說宦遊樂如君棄官復
不惡何處不說有炎涼如君杜門復不妨縱然疎拙
非時調便是悠悠亦所長

贈殿卿

前年賜環承 主恩去年解裾辭王門身經畏途色
不動心知世事口不論自顧平生爲人淺羨君逃名
我不免自憐垂老尚憑陵羨君混俗我不能有酒便

呼桃葉妓得錢卽飯蓮花僧

金吾行贈戴將軍

先皇諸將何其雄君家大人國士風賜錢畱起嫖姚
第詔宴數入蘭臺宮五雲忽變石城氣七校親隨
萬乘東當年帶礪山河在四海車書日月通侍從敢
聞 潛邸事朝廷竟錄代來功此時十歲羽林孤躍
馬能彎兩石弧漢主臨軒求故劍承恩一拜執金吾
生成燕領寧辭武得奉龍顏不羨儒三提鹵簿陪
陵寢再護樓船下郢都禁中自失張安世天上還看
周亞夫

逼除過右史水村江山人同賦

夜來北渚北風急打頭雪花大如笠片紙東飛右史
書詰朝小作湖中集到門白鳥出高巢繫馬南山迸
人入使君亭午未解醒肅客登筵一長揖地僻兼無
俗子妨樽空況有鄰家給意氣還須我輩看功名但
任兒曹立瞥眼旋驚青歲徂沾唇莫放金杯澀世上
悠悠已自諳卽今不飲嗟何及醉聽楚調起寒雲綵
筆憑陵朱絲濕平生多少伯牙心此日因之寄篇什
賦得鴈池送許右史游梁分奈字

漢家藩國稱冠帶鴈池多暇爲高會賓序同推枚叟

尊星潢共指梁王大賦成錦字映長流酒酣飛羽傳
寒瀨藻翰常生授簡中潺湲不散鳴箏外清影朝含
竹苑霜悲聲夜雜吹臺籟白首君恩豈稻梁朱門旅
跡非蕭艾極知慕侶倦游人秋來肺病誰能奈

道逢郭子坤擁妾戲東

城東桃花噴路光春風吹送孝廉郎自擁佳人馱細
馬時臨綠水照紅妝羅裙已奪石榴色禿袖單衫杏
子黃跣鐙微籠雙玉趾揚鞭笑起兩鴛鴦同棲孔雀
言猶妬並蒂芙蓉願始償爲謝使君休借問郭家少
婦身姓王二八盛年眞擅寵只今三十尚專房持齋

能苦頭佻行發誓曾燒頂廟香浩劫自知仙女分他
生常在世尊傍每脩好事辭書舍但有佳期入道場
纔着霓裳顏更少但盤雲髻墜先狂假令不信吹簫
侶試向秦臺看鳳凰

和許長史箏伎篇

君不聞秦箏多慢聲平臺女兒新長成家本邯鄲行
步好生年十三指爪清安得此雙絃索手那能獨酌
高陽酒正值傾囊無俸錢將來換馬還肯否自從解
贈同心結不惜樽前香腕折幾回玉柱鴈池飛春愁
散作梁園雪合就羅敷陌上桑含顰一轉發中堂遙

知華髮王門客縱是風流也斷腸

答寄殿卿見夢之作

憶昔紅顏日攜手一別三年非不久縱使天台記阮
郎也應梁苑稱枚叟故人多病卧青春華髮如蓬自
看醜漫爾風流更旁騷從他憔悴仍耽酒悠悠世上
竟須疑夢裏相逢知是否

和殿卿春日梁園卽事

梁園高會花開起直至落花猶未已春花着酒酒自
美美人但飲醉卽休纔到花前無白頭紅顏相勸若
爲雷春風何處不花開何處花開不看來看花何處

好空回

答寄子威

劉生家本安東子不爾高名那如此十載論交少聞
問君胡尺書數千里蒼頭大奴前置辭主人束髮重
知己家本闔閭城下兒清風獨爲延陵起便從出刺
三河還攬轡爭誇按百蠻早歲升公趨漢署只今謝
客卧江關雖言萬事歸來好乍可論交到誰老猶作
鳳凰池上看窮途殺更耽文藻中間跌蕩復王郎伏
臘扁舟發太倉但語卽翁常在口彼時多士儼成行
宦情漸覺綈袍勝秋興翻隨綵筆強魏倩一珠纔照

乘主人雙壁竟登場倡余和汝篇相及日居月諸業
以集共道提戈虎穴廻儻容投謁龍門入開械寒色
散陽湖白雪樓空嶽影孤不盡雄才推二妙止如古
調已吾徒一當單于則豈敢相遇中原尚足圖但語
主人須自愛一時長句似君無

酬李東昌寫寄白雪樓圖

并序

樓在濟南郡東三十里許鮑城前望太麓
西北眺華不注諸山大小清河交絡其下
左瞰長白平陵之野海氣所際每一登臨
鬱爲勝觀東昌李使君子朱以讀白雪樓

集於廣川馬中丞家咄然壯之歸爲圖以
寄而攀龍贈焉如此

詩名東郡沈隱侯那復擅奇顧虎頭江湖槃薄有能
事畫我山中白雪樓推毫已驚海色至無乃兼驅蛟
蜃遊須臾百里岱陰合咫尺疑聞清河流華不注山
得非雨平陵以西胡獨秋松風似欲卷綃起良久看
雲失去畱丹青快意癡如此邱壑過人老郎休使君
實解郢中調爲爾深知宋玉愁

送鄭生遊大梁詩序

鄭生者名文賢楚之雲夢人也少慕魏伯

陽之術往往談長生自雲夢來關中三千里持一囊藥耳所至逆旅醫小兒卽食其嫗醫老卽食其子弟醫婦女卽食其夫度三千里如在里巷中矣然不爲糈也其來關中庶幾望見能爲長生者焉余蓋苦多病三十年於此言醫也卽未嘗見醫視脉如生者豈其診書異有它禁方邪生又自言醫且五十年於此手指之附人脉多於握匕著咀咬如邱陵卽未嘗不精神與病者通長桑君豈實視鬼垣一方人哉不察

見脉而治病其礙豈啻垣一方關中故多賢豪人卽如大中丞何公博物君子也亦言生矣余又言秦越人來長安遊時事生未嘗不輒苦其術而隱之不得屬余在告將歸生亦欲遊大梁則關中自大中丞許公大司徒劉公以下皆賦詩贈之而余序其右方云

君不見黃鵠高飛未可羅榆枋之雀奈我何拂衣春色爲黯淡故山高卧白雲多風塵誰識大梁行夷門輕薄笑侯生虛左莫言公子事今日邯鄲已罷兵金

丹初出照人寒
瑤草千年老鵝冠
更欲清秋觀渤海
那能渴病滯長安

代香山寺老僧答

老僧何處來
迎客身無袈裟足
無鳥雖有弟子今流
離獨向空山種麻麥
先時長者布黃金
大師說法如來席
浮圖中霄天樂下
禪臺雨花坐盈尺
共道當朝少游幸
唯此祇園有恩澤
綵仗晴連鸚鵡林
宮娥晚傍蟾蜍石
侍從求看貝葉編
焚香再拜開琳碧
我往能言西域文
珠西馬取華嚴譯
自復懸燈香爐峯
君其問臘庭中柏
何曾見鹿招提鳴
老僧

羯虜公然馳赤縣
湖外秋風笳吹聲
猶疑窮谷豈遽至
已聞野哭尸縱橫
裹創被血竄榛棘
問之不答慘且驚
須臾牛羊蔽陵壑
三騎五騎擐長纓
捫弓北嶺飲南澗
驕氣直欲凌欖槍
一騎常驅百漢人
一人常聯二騎行
翻身仰射罟罟落
束茅縱火燒朱甍
豈無卓錫答其背
佛力不祐人心傾
西堂北邱緣業惡
寺前荒冢遂崢嶸
亦是官軍入援急
匈奴颺去歸其營
匍匐漸從草莽出
晝伏夜走同狐鼯
衣鉢蕩盡微軀在
性命真如飛鳥輕
文人豈願聞喪亂
神州豈宜有戰爭
故人更邀住廬嶽
萬乘垂衣右北平
燕中耆舊

滄溟先生集卷之五
寄書說早晚單于和議成語罷空林轉蕭瑟茫茫天
地終何情

滄溟先生集卷之五

滄溟先生集卷之六

濟南李攀龍于鱗撰

五言律詩

酬皇甫虞部寒夜書懷見寄

兄弟播清徽詞林振羽飛
再來郎署重何謂宦情違
夜雪畱沽酒寒燈坐掩扉
共嗟羈物役歲晏此依依
圓硯效徐庾體

片石分雲出良工向月刪
自疑臨壁水誰爲縮壺山
洗墨沈金鏡呵冰斷玉環
畫眉京兆婦織指曲池間
秋扇

自從團扇棄空復掩梁塵寒影收雲葉清光暗月輪
誰憐班氏女薄命漢宮人但使緘蘭笥君情會更新

同皇甫繕部寒夜城南咏月

片月掛遙空層城曳素陰寒分宮樹淨影落御溝深
結冷悲征笛勻霜上擣砧西園芳宴後白雪復誰吟

元夜

公子聯鑣語佳人把袂歡星橋雲外出火樹雪中看
夜色開清禁春醑許從官仍聞祠太乙達曙禮仙壇

登省中樓望西山晴雪

忽見西山雪高樓重倚闌數峯城上出落日署中寒

佳色繁天仗清光切露盤小臣操郢曲願獻聖人看

憶弟

新醪楊柳色不醉欲何如薊北三春鴈山東二弟書
宦情閒遂淺人事病全疎未擬酬恩去空令憶舊廬

初夏趙氏園亭

獨值春風後幽期此重過開樽黃鳥至高枕綠陰多
簪紱殊閒事乾坤一放歌淹留君莫厭吾道本巖阿

送孟得之

十載薊門客秋風見長年思家明月夜驅馬白雲天
來鴈授衣後黃花落帽前何人過携酒共醉黎陽川

登省中樓

蕭瑟賦悲哉西山爽氣開白雲海色斷落日秋陰來
砧高長樂苑鴈下華陽臺如何此時望客思轉難裁

酬徐員外舟中新詠見示

何處逢搖落秋風又別家天清鴻鴈影江滿荻蘆花
明月留仙珮寒星犯客槎到來開篋笥新句動京華

送諸光祿還於越

幾年東省月坐憶故園遊忽有緘書至蘭亭禊事修
芙蓉天鏡曉風雨石帆秋到夜應逢雪門多乘興舟

長陵

明禋趨歲序陟降儼昭回容物中原在乾坤北極開
松楸千騎入風雨百靈來共話犁庭役遺弓重可哀

朝陵夜作

上陵無不美秋杪更宜看風雨朝佳氣旌旗擁漢官
星流千嶂過月出萬松寒倚馬清鐘外新霜滿玉鞍

白雲樓

諸郎難得意非是敢沈冥拙宦無同病清時有獨醒
千家寒雨白雙闕曉煙青又值高樓鴈寥寥不可聽

送楊子正還濟南

我家白雲渚落日掩孤城讀書草堂上濯纓湖水清

古來失意事不獨名未成北風敝裘雪誰見棄繻情
重送楊生

十年湖上別風雪此相親把酒論時事霑衣向故人
浮名青歲換生計白雲貧但去卧芳草山中鴻鴈春
殿卿至

駿馬何當出金高郭隗臺雪中春酒熟書後故人來
白首文章事青雲王伯才誰爲一知己念子正悠哉

送殿卿

嗟君復失意吾道轉堪疑白雪論先達青雲合後時
落花寒食過載酒故山期莫以楊朱淚春風灑路岐

章行人使潞藩

使者持符下風塵叱馭前諸侯城赤狄列嶂黨青天
牟麥祈年時芙蓉避暑筵相逢多愛客共賦遠遊篇

十六夜集劉子成宅

羽書三十度飛騎動長安今夜樽前月還同燧火看
入門清影滿久坐素華寒何處關山引如悲行路難

聞砧

永夜盧家婦深閨坐自傷拭砧散明月投杵上清霜
別恨繁鴛綺哀音急鴈行同袍征戰盡刀尺斷人腸

送張比部募兵秦晉諸郡

天威嚴滅虜使者出秋官白羽徵兵入黃金結士權
風雲千騎動雨雪二陵寒無易行間客能登漢將壇

送沈郎中守順慶

見說褰帷處千山擁使君嘉陵渡春水棧道轉秋雲
郡下平蠻檄家傳諭蜀文病餘饒卧理能不憶離羣

春日韋氏園亭同元美賦

二首

春塢花冥冥斜陽倒玉餅風塵猶傲吏天地此空亭
共醉薊雲白相看燕草青我來吟澤畔不是獨爲醒

其二

藉草到流水看花延落暉客中過寒食馬上改春衣

移席青山出開樽白鳥飛天涯有朋好能使宦情微

夏日同元美徐子旋賈守準劉子成集張氏

園亭得談字

共載杯中物聊停塵外驂路人終白眼世事豈清談
高枕夏雲出空亭斜照含竹間有流水可以漱餘酣

初夏同元美汪伯陽皇甫子循集姚明府園

亭得春字

五柳陶潛宅猶藏杜曲春綠陰衣上滿黃鳥席邊新
河朔當年事風流我輩人胡爲日車馬擾擾向紅塵

送蔡少府之陽武

君歸寒食後猶及縣中花趨府具茨野鳴鞭博浪沙
大河秋色外使者白雲槎豈不勞行役風塵見歲華

爲殿卿悼亡

歌梁塵未斷舞袖影方閒落月窺珠鏡青春暗玉顏
爲雲歸峽裏竊藥去人間安得招魂術姍姍步幄還

答殿卿

故園春草後書札問同袍海嶽遊當壯風塵卧正高
大名詩裏出浮世酒中逃顧我仍多病時危小吏勞

送獲嘉郭明府

仙舟新出宰秋色渡淇河官屬諸侯貴君才百里多

政齊吳季重地接衛朝歌漢主憂南服長纓送尉佗

雪溪徐山人 二首

風塵餘鬢髮天地此栖遲不問家人產寧求國士知
門無荷蕢過鄰有灌園期得道憑烏几藏名號鹿皮

其二

自有浮雲戀非因倦鳥還林光清客夢湖色駐人顏
歲序高懸榻風塵老抱關不投明月壁甘隱大雷山

毛刺史姑茂高齋

武陵看花處二仲得相聞雨白闔天合山青越徼分
書聲散秋瀑翰墨染春雲府檄何年事猶餘猿鶴羣

出郭

出郭隨吾適人家杜曲邊溪流紫去馬山路入鳴蟬
禾黍殷秋作茅茨足晝眠可能祛物役歸買汶陽田

張氏園亭

辟疆開別業載酒雨中看亭敞千花暝樓空萬竹寒
呼童移枕簟勸客解衣冠宿我山窗下聽詩坐夜闌

碧雲寺禪房

佛土秋逾淨花臺夜復香一燈醒夢幻孤磬散清涼
月上梵輪滿湖開天鏡光新詩分妙偈病客對空王

早春元美公實訪茂秦華嚴精舍同賦

招提多病客擁褐世間情法自傳燈得詩先卓錫成
年光雲樹麗春晝雨花明若許東林住還攜漉酒生

十四夜同王徐宗梁四君子集靈濟宮 二首

愛此壺中約人皆曼倩才華燈懸日月仙樹接蓬萊
青鳥銜詩去金貂換酒回明宵祠太乙方士漢宮來

其二

逍遙元圃望清切紫微層月出三山樹春回萬井燈
無悲田變海但願酒爲澠門外金羈影王孫自五陵

張山人

吾鄉張仲蔚未是蓬蒿人伏臘東籬下漁樵北海濱

官家還賦役客路且風塵織妾齊紈素開筵嬌上春

春日

爲客淹歸騎思家過斷鴻春衣花發後寒食雨聲中
生事羞人問時名與衆同自甘郎署隱不哭宦途窮

柬公實

如何梅發後更憶故園春海上多歸夢天涯一病人
世情元慘淡宦跡好逡巡莫作鴻冥客青雲未可親

同元美與諸比部早夏城南放舟 六首

豈悟風塵客還能汗漫遊天涯唯短髮海內此扁舟
宦跡清時劣人才畫省優百年渾綠醕一日且滄洲

其二

最憐行役久爲樂未言疲自起投車轄長歌覆羽卮
江湖青雀舫僚友白雲司醒後驚相問佯狂信有之

其三

誰爲河朔飲吾願罄交驩杯動滄波色舟空白日寒
題詩溪鳥過岸幘野人看不是江湖興風塵此道難

其四

落日維舟好君其問水濱舉觴遙送鳥倚樹醉看人
各負詩無敵翻驚會有神明朝在城郭騎馬共風塵

其五

春歸興不孤勝地此相呼公等稱詞伯余將混酒徒
山光含浩蕩秋意颯江湖樂事關窮達浮生敢自誣

其六

言尋韋杜曲與客放船行樹影含衣動溪光逼酒清
狂來出真態醉裏見浮生所以山公後寥寥達者名

寄茂秦

向來燕市飲此意獨飛揚把袂看人過論詩到爾長
世情搖白首吾道指滄浪去住俱貧病風塵動渺茫

再遊南溪同應駕部徐比部賦 四首

此日南溪約應徐賦客同據牀干竹下進艇百花中

天入華陽館雲生碣石宮昔賢何慘淡吾醉任鴻蒙

其二

覆席花如待窺簾鳥似知到來拚共醉坐久見吾詩
吏跡江湖傲仙才日月欺幸逢休澣出不顧尚書期

其三

宴遊無俗吏休沐有殊恩碧草堪同藉紅塵可重論
溪聲畱倚杖山色取當樽夙昔疑吾醉維舟尚在門

其四

花鳥從春過嬉遊到夏偏白雲行酒上清吹起舟前
世路身何得吾徒賦必傳寧須千日醉不擬衆人憐

郊行二首

稍似武陵溪人家綠樹迷桔槔茅屋上荷篠薊門西
清吹生衣袂繁陰散馬蹄紅塵纔只尺城郭意多睽

其二

並馬未央前看雲過灞川時逢黃鳥佳欲就綠陰眠
宦豈登臨拙名非案牘傳風塵朋好在回首汶陽田

東元美二首

偃蹇寧知病今如藥裏何清齋山雨至高枕夏雲多
詞賦芳顏妬風塵壯志過相憐誰最久把臂此蹉跎

其二

久矣疲朝謁深惟傲吏情臨風看玉樹消渴望金莖
返照虹蜺出浮雲駟馬行慚無枚叔賦起爾薊門城

夜過元美二首

眼底誰同病天涯好自親放歌依日月縱飲向風塵
世態搖知己時名走衆人朝叅君莫嬾漢主憶詞臣

其二

病卽科頭出狂仍枕腹眠禮非因我設汗不受人憐
興盡銜杯外言深把燭前開門看墮月騎馬問朝天

夏日同元美子與子相天寧寺送別公實二首

宴坐人天近清齋僧夏深出門成遠道駐馬向祇林

益愧風塵色相看湖海心惠休能怨別爲擬碧雲吟

其二

西域黃金地南訛大火天贈言迴白雪寒色動青蓮
幻跡抽簪外浮名把袂前古今皆涕淚去住各風烟

夏日同元美子與集子相宅

佳客堪常見幽期暑亦過披襟度風雨把酒出星河
嬾拙元相藉文章敢自多夜深忘白羽玉樹倚蹉跎

柬子相 二首

已負西山約將無惜壯遊懷人當落日卧病復清秋
時事君高枕風塵我敝裘加餐看物理天地一虛舟

其二

楚客秋多病羈心私自憐各天散朋好八月見烽烟
白露寒砧下青楓過鴈前豈應裁恨賦寫任故人傳

別汪正叔員外

幾年金虎署與爾結交歡傲吏莊生似詩家鮑叔看
春光燕樹合雨色薊門寒各技臨期淚風塵去住難

懷魏順甫

白雲同署客相念意悠哉交道蕭朱失文章屈宋來
風塵還傲吏案牘豈時才不見黃金駿秋高薊北臺

登黃榆馬陵諸山是太行絕頂處 四首

黃榆高不極臨眺亦奇哉河勢中原拆山形上黨來
白雲橫塞斷寒峽倚天開搖落清秋色多慙作賦才

其二

不盡寒雲外青峯落照多秋陰生大齒木葉下滹沱
巨壑藏風雨飛梁挂薜蘿重關三輔地躍馬意如何

其三

振衣巖木下倚杖白雲層落日懸狐塞清秋度馬陵
千峯寒自出大澤莽相仍左瞰邢襄郡分符憶股肱

其四

秋色自冥冥風煙接井陘關門開 日山路出寒星

太守方乘障清時敢勒銘杉松迴朔氣哀壑未堪聽

答明卿病後見寄 二首

薊門搖落後楚客病如何秋色高金掌西風滿玉珂
開樽鴻鴈至染翰五雲過應憶山陰會疎狂阮籍多

其二

吳生何偃蹇稱病不朝天侍從官非拙浮沈世所憐
黃金燕士裏白雪郢人前自識銜杯趣邈看結襪賢

寄元美 二首

宿昔神仙省青雲向爾親償金聊玩世抱玉故調人
氣色高題柱文章老斲輪別來多所憶卧病上林春

其二

豈不爲同舍于時媿重名佳人誰獨立大將爾橫行
病起高詩興春光美宦情懸知思遠道落日薊門城

卽事 四首

浮雲如浪跡春色且邢州磬折人堪老蕭條客自愁
孤城山下出大陸日西流請郡終何意風塵復倦遊

其二

天涯看薄宦何以異漂蓬才豈分符後名非薦疏中
黃塵霾落日白羽插春風聞道漁陽戰方論衛霍功

其三

嬾媿終疑傲和光意遠哉元龍無客禮方朔有仙才
疾苦塞帷過風塵領郡來那須論往事作賦柏梁臺

其四

使者殊旁午吾生自不辰文章看長物道路竟何人
寒食孤城外檐帷大澤濱那堪楊柳色風雨傍行春

寄宗考功 二首

別離如昨日豈厭廣陵濤春色漁陽滿烽煙海上高
文章迴白雪顧眄解綈袍下走猶三輔蕭條欲二毛

其二

春色還堪起青雲固可披振纓人不病把袂客能詩

海濱集 卷之六
奏事明光殿掄才藻鏡司稽康猶自嬾早辱巨源知

寄殿卿 二首

人情原慘淡世路故蹉跎意氣彈冠少風塵按劍多
客居深雨雪春夢遠漳河賴有西山色猶堪載酒過

其二

燕山爲客地莫共酒人居吾輩詩名大其徒劍術疎
風塵官不調雨雪歲將除何限東歸意春花滿舊廬

春興 二首

短髮黃塵裏浮生白日徂詩名堪自見經術敢相誣
薦列終才吏逢迎豈壯圖有年輕召杜不病足江湖

其二

案牘將能事文章敢具陳跳梁看此物隱几過時人
返照生殘雨浮雲矯上春夙心唯病免不欲滯風塵

重送許永寧 二首

絕域天應斷揚波海未平浮雲隨薄宦華髮繫微名
傳檄西南定塞帷瘴癘清看君饒卧理經術晚逾成

其二

世情今可見此謫竟堪陳偃蹇難容汝文章不利人
清秋炎海外落日大荒濱莫更埋銅柱功名老漢臣

郡齋送張肖甫 二首

海集 卷之六
詩
薊門相憶處豈不問加餐卧理非吾意詩名向爾看
白雲尊酒盡山色郡齋寒莫惜重投轄秋風道路難

其二

送君何所有城上太行山落日堪相憶浮雲未可攀
俱言張翰去得御李膺還莫自悲秋色能摧壯士顏

閣夜示茂秦

四首

相逢殊不惡久別竟誰驩貧病它鄉老交游古道難
開樽山欲出說劍雪逾寒如此蕭條色高齋爾自看

其二

爲客今猶在浮名信已勞病來衰綵筆老至戀綈袍

卧閣風塵過銜杯夜色高舊知江夏守不厭襦生豪

其三

病起看時事歸心不可裁著書官欲罷問字客還來
月出樽堪滿霜清角自哀相憐成白首明日阻三臺

其四

把袂今何夕高齋雨雪清詩才君矍鑠酒興我從橫
同病無交態相依豈世情春來徵渤海陳對引王生

寄元美

四首

我昔朝宗日君停使者軒並驅皆上駟相遇復中原
草昧詞人起風塵國士恩別來春色滿無處不銷魂

若問除書意君何異積薪姓名常借客踪跡竟疑人
爲郡空高第當朝各要津拂衣吾所欲不是避風塵

其二

漁陽春欲盡漢使未堪愁邊郡多豪俠風塵一壯遊
浮雲寒大漠白日澹幽州莫更觀遼海蕭條正北流

其三

何悟淹爲郡風塵日以難宦情疎自解人事拙相看
高枕西山色清齋大麓寒期君秋月滿從此掛吾冠

其四

夏日行部遇明卿子與於慶陶邑

何來漳水上早晚發長安放逐吾曹在風塵此道難
孤城高自卧萬事醉相看莫擊鄒陽劍霜飛五月寒

郡齋與元美賦

握手今何夕高齋共此樽衆人方睥睨二子向乾坤
經術從吾淺詩名得爾尊當時楊馬輩誰復在金門

送元美 二首

吾曹天地在不惜滯風塵意氣能無合文章自有真
齊名他日事側目此時人爲別還秋色樽前白髮新

其二

把酒論離索寒帷送友生白雲高大麓秋色重孤城

海濱集 卷之六 其
偃蹇還詩句蕭條自世情贈君無趙璧落日片心明

黃河

復就三秦役還爲四牡歌北風揚片席大雪渡黃河
才豈諸郎少名非一郡多儒官明主意吾道好蹉跎

關門雪望

西來千里雪斜日滿面關秋水何當落浮雲自不還
積陰高紫氣寒色壯秦山似欲欺雙鬢蒼茫到客顏

發長安

此處看春色蕭條客自禁風塵爲郡過踪跡抱關
不盡傳經意難言作賦心故人多道路薄宦有登臨

涇州

迴磴層雲上孤城返照間人煙趨白阪睥睨走青山
芻粟浮涇下旌旗度隴還時看乘鄣吏車馬出蕭關

秋日 四首

薄遊寒暑換仍自滯孤城華髮看人事浮雲識宦情
拂衣驅病色懸榻避時名但欲眠清晝相嘲任友生

其二

此物還堪惜何官不可休驅馳如昨日藥餌更清秋
名已千人廢家徒四壁愁南山歸自好沮溺本同流

其三

倦遊非一日乘興復三秦多病難爲客浮名喜中人
未堪沈案牘何以走風塵祖帳東門外賢哉一老臣

其四

還鄉明日事可奈簿書勞棄置看同病風塵避二毛
酒如涇水濁枕對華山高不是清秋色何人見反騷

五日和許傳湖亭讌集

二首

城頭片雨懸客醉嵒湖邊酒奈榴花妬人堪桂樹憐
五絲還令節雙鬢抵流年莫蹋王孫草淮南賦已傳

其二

青樽臨北渚一爲故人開此事成今昔浮雲自往來

花間移枕簟鏡裏出樓臺忽就投湘賦深知賈誼才

寄元美

寥落文章事相逢白首新微吾竟長夜念爾和陽春
把酒千門雪論交四海人卽今燕市裏擊筑好誰親

贈子與

握手論文者春來限各天卽今行樂處不似舊遊年
神物風塵裏時名我輩前豈令徐孺榻白日此長懸

汪員外移水部時城京師汪爲植

聞有金城役掄茲水部才中原憂被髮使者詠于懸
睥睨燕山接風雲瀚海來懸知胡騎遁天子宴蓬萊

卽事 四首

羽書秋色外飛輓海陵廻日上犁庭議時難度漠才
物情奇士過天造異人來側席勞

明主黃金正滿臺

其二

卽今難授鉞誰可靜胡塵談笑存能事艱虞失衆人
大軍歸掌握王者自經綸不復憂驕悍如林護北辰

其三

使者晨馳壁奪歸平虜章自大懸斧鉞擇日設壇場
萬馬中原集諸軍上苑旁

主恩無可報一戰取名王

其四

天子何神武乘秋欲破胡儒臣擐甲冑大將解兵符
叱咤風雲合艱危日月扶北瞻 陵寢色蔥鬱近

皇都

賦得屏風

虛屏漢宮裏有女白頭吟色倚琉璃怯秋來湘水深
歡情張畫燭愁坐掩清砧莫爲蒼蠅誤君王在上林

渡滹沱

滹沱來不極曉色蕩孤城擊楫中流過塞帷下吏情

海漢集 卷之六
天銜紆岸轉日上大波行獨在知津後風塵見濯纓

廣陽山道中

出峽還何地杉松鬱不開雷聲千嶂落雨色萬峯來
地勝紆王事年饑損吏才難將憂早意涕泣向蒿萊

趙州道中

獨往何爲者栖栖意不歡寒帷秋雨過伏軾夏雲殘
潦水陰相積蒹葭晚自寒大夫方跋涉天步屬艱難

吳舍人喪內二首

楚妃色殊衆不獨下堂悲鼓瑟瀟湘夜秋雲未可持
河流雙露掌月出萬年枝屬有將離曲能無泣鳳池

其二

可憐御溝水見此白頭吟病客思江郡詞臣在上林
春風動花樹秋月散清砧唯有陵陽淚知君抱玉心

和殿卿白雲亭醉歌

狂殺王門客空亭日嘯歌那知珠履散自愛白雲多
短髮明秋水長裾曳芰荷獨憐枚叟在不復厭婆娑

元美以家難羈京作此爲唁四首

馳騁淄澠日功名與宦情高堂一爲坐世路遂相輕
行乞還燕市悲歌復薊城佩刀風雨夜堪作箭中鳴

其二

一自抽簪後漂零見此身通章尋悟

主懷刺更依人寒入綈袍色愁生黍谷春不因家難
劇君豈在風塵

其三

海內論兄弟蕭條二子才一時稱病罷萬里拂衣來
雨雪人高卧蓬蒿客自回偶然占劍氣夜夜向燕臺

其四

聞道周旋地偏承老父顏橐籥時在側賓客稍居間
函谷更封出夷門執轡還莫將公子淚亂漫灑燕山
滄溟先生集卷之六

滄溟先生集卷之七

濟南李攀龍于鱗撰

五言律詩

春日閑居 十首

卽令闕請謁何用乞江湖僻性終難狎浮名本易汙
杜門人事過欹枕歲華徂薄俗還堪畏崎嶇比宦途

其二

白日移高枕青山答放歌病纔宜偃蹇老自厭婆娑
禮數諸生絕交遊二仲多江湖春正滿更欲混漁簑

其三

藥餌休官嬾蓬蒿謝客深濁醪殊解事高枕自知音
老大翻陵勁文章豈陸沈浮雲終日在瀟灑竟何心

其四

五穀功名薄雙龍羽翼乖風塵凋短褐雨雪閉高齋
慘淡幽人色飛揚壯士懷少年何太苦妖冶事形骸

其五

奉使談經日單車西入關掄才牛口下得士鳳毛閒
白雪千人失黃河萬里還卽今高卧處猶不減商山

其六

乞歸君已見削迹我何求交態疎能變時名久自休

中原來病色萬里入春愁不是忘機客還驚海上鷗

其七

結舌論文地甘心養拙年朱門人自老白雪調羹傳
世路蓬蒿外浮名燕雀前中原二三子夙昔共輝旋

其八

病起獨登臺春光萬里來浮沈還我輩俯仰見人才
華髮風塵過青山雨雪開浮雲堪倚杖落日好銜杯

其九

漂零唯濁酒落拓總狂生彭澤差聞道高陽橫得名
罷來詩慘淡卧久興淒清日對春湖色潺湲嬾濯纓

其十

五柳嵒湖濱先生隱是真文章堪側目潦倒竟全身
何必論交地長須縱酒人卽令東蹈海斷不混風塵

夏日東村卧病

十二首

平生偏伏枕暇日是抽簪病著青山色愁高白雪音
雲霄懸出處踪跡閒浮沈不必名俱毀方知二仲心

其二

放歌知帝力縱飲見天真綵筆風雲老青樽日月新
詩驚噉蔗客酒讓采薇人卽使妨幽事何須傍隱淪

其三

自甘成獨往誰復病相憐金盡論交地囊餘解擯篇
清齋芳藥餌華髮媚林泉不必憂生事深耕種秫田

其四

不謂幽棲處還堪抱膝吟大雲千里駐片雨二湖陰
暑逼藤蘿淺涼生栝柏深鮑山終日在知己媿黃金

其五

未同疎雨至勿翦夏雲繁片華樽前出雙流樹杪翻
紅顏辭上國白眼入中原慢世吾何敢風塵且避喧

其六

拂衣先達怪高枕故人疑世路衡門左軒車負郭遲

少年誇解事薄俗諱言詩何處堪遙集悠悠未有期
其七

每逢河朔飲輒憶廣陵濤起色含佳句流光逼濁醪
興緣知己盡名豈罷官高髀肉看如此何論長二毛
其八

空林風雨過瀟灑一樽開看竹俄蠲疾漂蓬敢負才
杜門辭問字落日罷登臺不是憐嵇阮誰堪把臂來
其九

夜半忽風雨層樓四望孤雷盤華不注電劃大明湖
雲霧連屏疊蛟龍抱劍呼飛揚天地意垂老見吾徒
其十
何物子虛賦深承漢主知一逢揚得意千載遂同時
諫獵功名薄爲郎日月私閒居堪避事稱病足逶迤
其十一

更閱人間世誰堪出處同江湖星自客詞賦日猶工
物色餘爭席生涯見轉蓬延陵皮相士竟失被裘翁
其十二
白頭明日事君不見交情千載論知己中原命友生
青雲高病色滄海傍詩名一爲彈冠誤徒令國士輕
秋日村居 八首

隱几憐清曉開軒命濁醪西風行薜荔白露綴蒲桃
氣逼蟬聲苦天含鴈影高壯心堪自見秋色正滔滔
病色還相假秋光溘自開清羸堪傍竹潦倒重銜杯
返照湖邊盡浮雲海上來卽今知九辯無處不悲哉
秋意長西北茗蕘望裏分青含仙署雨白動帝鄉雲
屈宋終難達巢由故不羣江湖三十載搖落好誰聞

其四

南山伏枕前北渚濯纓邊林薄秋逾厲雲霞曉自鮮
談詩成白首把酒望青天萬里中原色蕭條此地偏

其五

不必知名姓中原一病夫柴荆存古色藥餌泥窮途
落日懸魚笱西風纏轆轤生涯君自見百畝白雲湖

其六

高齋清自掩遙夕病相看片月花間淨明河樹杪乾
流螢含火著宿鷺抱霜寒何限同袍意江湖坐渺漫

其七

白雲不搖落湖上長悠悠世事銜杯過人情把袂休
秋光棲白老日色澹相愁況復多風雨蕭條傍倚樓

其八

搖落唯高枕風塵且閉關醉來雙白眼病起一青山
交態元難作詩名已自閑有人湖海上無事馬蹄閒

冬日村居 四首

高卧堪人事幽棲豈世情老松寒更拙片竹冷逾清
擁褐江湖色鳴琴雨雪聲嬾心常近傲不是學莊生

其二

百年長藥裹三徑且蓬蒿華髮拙簪短青山伏枕高
漂零知濁酒雨雪見綈袍似解冥鴻意翻然變羽毛

其三

寒郊不可望蕭瑟掩柴扉宿霧含霜苦斜陽帶雪微
清齋宜病色生事合漁磯欲奏滄浪曲江湖此調稀

其四

遙夜憐幽獨南山傍戶庭泉流霜下白野色海邊青
風亂將殘燒寒疎欲曉星偶因樵唱起延眺及林垌

寄華從龍比以魚橘見致

多少人間事誰能便作書罷官君更早謝客我何疎
八月來吳橘三江下楚魚因風裁數字一問子雲廬

月

不是山中月誰能坐鬱陶蟾孤憐凍影兔老愛霜毫

海漢集 卷之七 六
暈疊金波動寒侵玉樹高爲題團扇句千里寄同袍
和殿卿神通寺見貽之作

花宮畱妙唱綵筆遍高僧說法從初地談詩出上乘
五言爭刻燭一字了傳燈元度前身是風流益可憑

同許右史遊南山宿天井寺

古寺馬蹄前荒山斷復連階危孤石倒厓響亂泉懸
喬木堪知午廻峯半隱天不因許元度誰此得攀緣

龍集寺

雙林窺壑險一徑入雲愁峯落青蓮色燈懸白日幽
香臺高枕出澗水閉門流聞道羣龍集明珠自可求

錦陽川九塔寺觀許右史碑

名山諧夙好況復近吾廬嵐影浮斜照茲川錦不如
空林雙樹老寒塔九華疎一片頭陀石新文六代餘

元日

五十江湖客風塵一事違漁樵供藥餌雨雪偃荆扉
白髮詩篇苦清齋病色微平生拚縱酒今日不知非
立春前夜齋居殿卿攜具見枉

茅齋殘雪在新月況當門春動西園蓋寒空北海樽
詩篇閑自遣交態老難論似覺行厨色能清病客魂

立春日齋居對雪憶元美

齋居何所作春雪是佳期淨入年華淺光含暝色遲
鳴絃流豔曲拂簡映新詩此夕山陰客扁舟興可知
龔生初度與郭子坤集開元寺餞許右史

論交三十載此地重尋盟夏臘高初度人天戀遠行
青蓮澄筆彩白馬識經聲曾是春山夜談禪對友生

逃暑

無處堪逃暑高樓坐夜分河流纏宿霧電影迸重雲
紈扇含冰彩珠簾網露文漢宮多貴幸何以答南熏

暴雨

西來氛甚惡夏至此何祥雨伏千厓怒風廻萬壑長

雷聲盤暗牖電影纏空梁少選虹霓出園林媚夕陽

寄子與使君 二首

一郡看如此扁舟意若何白雲天目遍春水太湖多
怪事寧辭賦幽人自薜蘿平生無俗客三徑許誰過

其二

我輩還堪見人間已厭聞大都常謝客不次各離羣
病酒仍耽句青山自白雲春來論數子飄泊有如君
龔克懋託疾不肯入試賦贈

似得冥鴻意兼深抱壁情一鳴堪自失三獻轉相輕
白雪看前輩青雲讓後生已須橫四海且復愛連城

寄懷余德甫 二首

豈亦逢秋色登臨若遠行江通灌嬰井山到越王城
何見非交態難言一宦情大東千里月石鏡好同明

其二

卽聞彭蠡鴈應上武陽臺華髮文章到青山放逐回
時名堪下榻秋興足銜杯不是求羊輩蓬蒿斷往來
二月十五日誕子
三十廬家妾明珠報使君國香元有種天馬自超羣
月應懸弧滿春迎翦紱分負薪還爾事豈敢望青雲
席上別王吳徐宗四子

仙吏滿蓬萊離筵氣色開檐帷寒食過風雨太行來
一失中原遇難論我輩才華陽猶駿馬涓者載金迴

答元美喜于鱗被召見寄 二首

十年君所見已分老蓬蒿安得浮名在將無執事勞
海鷗羣自下天馬步元高五柳還須種徵君不姓陶

其二

那堪成僻性非不愛明時白髮終憐我青山好屬誰
連城高一抱流水妙相知君自墻東客行藏豈更疑

過呂梁

十年稱病客擊楫在樓船漸下波方溜風鳴水正懸

清江集 卷之十一 九
青山高卧裏白髮壯遊前起色聊相假終慙傲吏賢

宦情 二首

初服終能事徐生已自違浮雲知失計漚鳥見忘機
越酒經春老江魚入夏肥他鄉如不病一任宦情微

其二

我輩誠何意于今自解難纍寧知衆媿儂已罷新歡
白雪狂歌盡青雲病疏看江湖終日在一任宦情閑

劉太保文安公輓章 十首

上公霑異典美謚表餘恩文並三光麗安同五嶽尊
朝廷先達在社稷大名存廟議當時事稱天有世孫

右贈謚

遣奠煩容物臨軒憶典刑祠官開正寢法從輟明庭
筵几知存問鍾彝藉寵靈老臣如就饗帷幄見談經

右諭祭

使從三省至地自九原開不作祁連象寧知漢代才
佳城跑躑躅法駕擁徘徊文劍今埋照于焉燭夜臺

右賜葬

國史從王事經筵飶 帝慈龍章紆後寵魚水見前
知雨露含天藻山河勒制辭門生堪視草猶作起家

疑

右頌誥

峴首羊公石千秋淚不禁孤墳寒自出華表鬱相臨
陰雨龍文動風霜鳥跡深更聞辭妙絕一字可生金

右立碑

自復遺書出相傳片字工史才依晉乘詩調託唐風
草疏回天力談經發 聖聰少年耽作賦頗欲擬河

東 右遺文

祠堂何所有遺像鹿臺山爲是懸車處常聞曳履還
諸生從上黨三老自壺關伏臘蘋蘩外談經俎豆間

右特祠

諸劉稱令族羣從復清操家自駒千里人皆鳳一毛
文章爭左袒禮樂盛東曹五世傳經術推公甲第高

右世科

一時求舊德千載憶皇都北斗高元氣南山永帝國
青雲餘几杖白首自江湖此日乘驄客閭門意不孤

右達尊坊

小子元吾黨前賢亦故鄉春秋存俎豆日月望宮墻
血食堪千載精靈自一堂唯應楊伯起秦晉鬱相望

右從祀鄉賢

再過子與

浮名難自託佳會豈相圖日月高詩社河山壯酒壚
歲星時一出白雪調元孤繾綣非爲佞風流不可無
七言律詩

送趙戶部出守淮陽

仙郎起草漢明光幾載軍儲事朔方五馬新爲淮海
郡三臺舊署度支章行車麥秀隨春雨卧閣花深對
夕陽時憶上林詞賦客鴻書遙下楚雲長

崔駙馬山池燕集得無字

主家池館帝城隅上客相如漢大夫十里芙蓉迎劍
舄一樽風雨對江湖橋邊取石鯨飛動臺上吹簫鳳
有無向夕不堪車馬散朱門空鎖月明孤

送彰德陳使君迎侍浙中

帝里初分郡檄回便迎青鳥建章臺東方千騎風雲
下南國雙帆河嶽來公子西園池上讌使君秋憲府
中才鄴天露冕行春日更許何人托乘陪

送郭子坤下第還濟南

華省栖遲白髮新因憐失意轉憐春樽前病起逢寒
食客裏花開別故人賦就自堪生顧眄才高豈合老
風塵燕臺郭隗君家事不擬驂騑不致身

送王郎守安慶

花滿胡姬春酒樓使君五馬五驂驪明光起草推高
第三十專城領上游天柱西懸江漢影海門東控帝
王州到來紆畫思同舍萬里風煙白鴈秋

送豐城杜少府謫滇南

共惜投荒萬里天當朝起草事空傳主恩綠鬢神仙
尉客夢青雲侍從年盤水秋帆開瘴癘黔陽春樹隔
風煙孤臣自有豐城劍遙夜思家向斗邊

酬谷明府見寄

清時詞客滿公車獨向漂零嘆不如老去已拚常縱
酒秋來何意爲裁書薄遊更自淹華省多病惟堪返

敝廬共道子雲長筆札知君近日五侯疎

秋前一日同元美茂秦吳峻伯徐汝思集城

南樓

萬里銀河接御溝千門夜色映南樓城頭客醉燕山
月笛裏寒生薊北秋胡地帛書鴻鴈動漢宮紈扇
好愁西風明日吹雙鬢且逐飛蓬賦遠遊

送孫郎中守承天

鬱蔥佳氣漢江邊

今上龍飛北極年過幸沛宮三日飲裁畱郢曲大風
篇仙郎珂散蓬萊月太守帷開橘柚天明到爲存湯

沐邑須知父老借才賢

劉員外家宸翰樓

君家司寇此樓居奕葉承恩片帖餘

帝自經筵傳翰墨人從冊府見圖書雲烟繞檻生春色牛斗開函散楚墟弦誦只今諸弟滿韋賢相業好誰如

送劉員外使黔中

牂牁萬里越王臺北眺中原秋色來江嶂忽分三楚斷海天不盡百蠻開白雲使者乘輅過金馬祠官擁節廻爲泛昆明誇上苑令知漢主自雄才

送大司寇之金陵

聞道銅標護百蠻當朝共擬伏波還來持滇海中丞節入領西曹法從班曳履春雲高北斗廻車秋色照鍾山顧期門客江城滿草奏時時達漢關

送皇甫別駕往開州

銜杯昨日夏雲過愁向燕山送玉珂吳下詩名諸弟少天涯宦跡左遷多人家夜雨黎陽樹客渡秋風瓠子河自有呂虔刀可贈開州別駕豈蹉跎

送瑞安劉明府

劉楨詞賦不羣才百里新承漢寵廻吳地青山飛鳥

下大江秋雨掛帆來白雲堪贈神明宰海色遙臨睥
睨開到日自逢花滿縣更憐春樹接天台

送許元復還姑蘇

薊門鴻鴈滿高秋張翰思家罷遠遊入洛故人名下
士度江寒夢雨邊舟客來白髮誰相憶賦就黃花不
可畱興發鱸魚堪自釣吳楓搖落未須愁

署中有憶江南梅花者因以爲賦

欲問梅花上苑遲座中南客重相思閑簾署有青山
色對酒人如白雪枝驛使書來春不見仙郎夢斷月
應知偏驚直北多烽火昨夜關山笛裏吹

與茂秦金山寺亭上望西湖

孤亭遙上翠微重檻外空林何處鐘秋到諸天開蒼
荀湖連雙闕散芙蓉雲光忽落鼉鼉窟雨色飛來鷺
鷺峯自信登臨能作賦肯令陶謝不相從

送汪伯陽出守慶陽

中原萬騎卻胡兵客領銅符塞上行大漠清秋迷隴
樹黃河落日見秦城邠人自美西羌俗漢守誰高北
地名郡吏可能無薦達還令介子乞長纓

送黃侍御按滇中

去矣乘風瘴癘開西南萬里壯遊哉登臺越嶲山形

合攬轡昆明秋色來周禮職方天外盡漢臣封事日
邊廻征蠻幕府今凋落安得樓船下瀨才

送包大中長蘆知事

九河水流何濺濺君去春花車馬前入幕官僚清宴
夕揮毫渤海白雲天相將牛酒勞從事未少魚鹽給
俸錢此去陸沉無不可于今薊北靜烽烟

除夕

幾年仙省白雲間此夕歸心醉裏閒九塞烽烟連北
極羊門雪色照西山還知傲吏能違俗未擬浮名好
駐顏長孺淮陽今不薄春花或恐滯燕關

元日早朝

禁城春色引朝天接跡夔龍近法筵雲裏金莖通御
氣宮中玉樹隱祈年西山亭障遙臨薊朔漢旌旗滿
護燕聞道至尊歌白雪小臣還獻郢人篇

早春得汝思蜀中書

萬里誰傳錦字廻楚天搖落正堪哀揚舫巫峽江聲
合立馬岷峩雪色來西極使星遙入部中原人日好
登臺莫言羽獵誇胡後不數揚雄作賦才

送憚員外按察郢中

醉擁驪駒不可畱送君花發鳳凰樓青春開府西陵

色到日登臺北鴈愁寒雨遠分荆楚望白雲無盡漢
江流共知人世悲難合儻得隋珠莫暗投

初春元美席上贈茂秦得關字

鳳城楊柳又堪攀謝眺西園未擬還客久高吟生白
髮春來歸夢滿青山明時抱病風塵下短褐論交天
地間聞道鹿門妻子在祇今詞賦且燕關

送大中丞王文赴山東

天下軍儲飛輓來中原胡虜戰爭回漢柱舊題驄馬
使名家接武佩刀才接章時拂風塵入憲府秋臨海
岱開 主恩偏憶嚴城日什二東秦保障哉

答宗考功齋居見贈

金莖夜擢建章高漢主祈年祀事勞仙吏詩投青玉
案故人秋卧白雲曹此生湖海供多病何物風塵抵
濁醪中散近來疎嬾甚更無書札到山濤

呈大司寇何公

漢臣韋氏有元成舊德中朝曳履聲督部曾持滄海
節總戎親破綠林兵重瞻執法臨天座自矢流言荷
帝情千載雲蒸龍變日更期文劔署高名

再呈何公

幾年開府漢中丞去後功名何武稱荆楚軍儲遮海

過潢池兵氣向秋澄尚書北斗天喉舌司寇西曹帝
股肱耆舊卽今推濟美清朝劍履坐相仍

春夜同元美子與子相過公實

西山落日照金莖北闕春陰覆禁城湖海百年今夜
酒風塵五子異時情和來白雪俱高唱自附青雲起
大名不獨諸郎關象緯真人應更爲東行

送萬言卿明府之長興

逐虜將軍度漠回黃金猶自滿燕臺請纓慙我爲齊
客製錦多君更楚材城上春雲天日出寒前秋色太
湖來弦歌暇日能相憶花裏新詩過馬

送范敬甫之閩中

共看驄馬使君賢開府東南日月偏海嶠秋陰分越
樹人家雨色散闕天 朝廷記憶江城久詞賦知名
水部前還擬主恩頭白裏時危相贈祖生鞭

五日同子與子相過公實時公實在告

空堂隱映石榴殷花裏幽期白晝閒染翰風雲隨上
客開樽雷雨過西山賦成敢避能驚座酒罷何妨善
閉關况值懷沙千古怨那堪騎馬獨醒還

韋氏池亭同元美子與子相賦

四首

貫酒新豐解佩刀相逢意氣爲君豪孤亭晝敞杉松

色亂石青含薜荔高自向風塵偏勝蹟豈令湖海傲
吾曹從他桂樹山中發招隱何勞更反騷

其二

華髮文章愧不工獨憐諸子調相同西京矯矯多奇
氣東海泱泱自大風三署仙郎攜酒後一時詞客此
亭中白雲寥廓迷幽薊騶衍談天碣石宮

其三

幽亭斜日亂松聲下有滄浪可濯纓求友花間黃鳥
出垂天城上夏雲生梁園作賦千年事河朔銜杯萬
古情莫恨風流吾輩晚鄒陽袁紹漢時名

其四

韋曲高臨漢苑開城南連騎紫宸回閉門流水花間
過倚檻青山席上來客難似矜能避世子虛誰見不
憐才若論承寵無先後安得吾曹共酒杯

送張元論虞部謫常州別駕

賦就黃花別季鷹還從遷謫問飛騰懸知漢柱名當
藉況復虔刀事可憑寒雨大江臨楚望千家秋色暗
毘陵闔閭城外逢搖落何限吳山客裏登

送吳人陸之箕

客有登臺賦遠遊薊門金盡坐高秋總憐岐路無知

已不向風塵爲白頭木落毘陵看過鴈月明張翰倚
扁舟未將簪紱論多病草色姑蘇到自愁

送李司封謫廣陵

明光起草羨青春服藥求仙笑此身白首雲霄空薦
士黃金湖海未逢人廣陵鴻鴈來秋色寒雨江楓度
逐臣見說故園湘水上嬾將詞賦吊靈均

滄溟先生集卷之七

